

Nassuiaatit nalinginnaasut

1. Aallaqqaasiut

Sanaartornermi neqerooruteqartitsisarneq pillugu Inatsisartut inatsisaat (Inatsisartut inatsisaat nr. 11, 2. december 2009-imeersoq) 2010-imi januaarip aallaqqaataani atulersinneqarmalli illuliornermi sanaartortitsinermilu pisortanit neqeroortitsisut neqeroorutinik pissarsiniarnerannut tunngaviusimavoq.

Inatsit arlaleriarluni iluarsineqartarsimavoq, kingullermik inatsisikkut nr. 15, 26. november 2020-imeersukkut, siumoortumik nalunaaruteqartarneq pillugu malittarisassat tassani atulersinneqarlutik, ilaatigullu suliaqartinniakkat ilisimatereerlugit neqerooruteqartitsineq aamma kommunit ingerlatseqatigiiffiisa inatsimmut ilaalneri pillugit aalajangersakkat erseqqissarneqarlutik.

Inatsimmik misilittakkat pingaarnertigut pitsaasuupput, illuliornermilu sanaartornermilu ineriartorneq aamma najukkani suliffeqarfiit ineriartornissamut periarfissaasa pitsaanerulersinnissaat pillugit politikikkut anguniakkat pissutigalugit inatsimmi tulluusaanerup naammassineqarnissaa pisariaqalersissimavaat.

Malittarisassanik ataatsimoortumik misissuinerup nalilersuinerullu aallartinneqarnissaat pillugu 2025-mi septembarip 15-iani Naalackersuisut aalajangiinerannik siunnersuut aallaaveqarpoq. Misissuinerup takutissimavaa inatsisip atuuffigisaa pillugu piviusumik nalornisoqartartoq, pisortani sanaartortitsisut arlallit inatsit allaffissornikkut oqimaatsutut sanaartornermillu suliaqartuni pissusiviusuni naleqqussarneqannginnerusut misigisaraat. Aammattaaq illuliornermut sanaartornermullu suliaqarfimmi pilersuutit inatsimmi tassani ilaatinneqannginnerat naleqqutinngitsutut isigineqarpoq.

Siunnersuutikkut inatsit malinnaatinneqalissaaq, taamaalilluni sanaartornermi piviusunut naapertuutulerluni aamma najukkani tunngaveqarneq, inuiaqatigiinnut akisussaaneq pillugu politikikkut anguniagaqarnermut ikorfartuilerluni aammalu pisortani illuliornermut sanaartornermullu allaffissornikkut aqutsinermi suleriaatsinik eqaannerulersitseqataanissaa kissaatigineqarluni.

Siunnersuutip ilaatigut kingunerai:

- teknikikkut ikiuineq (siunnersuisarnerit) aamma illuliornermut sanaartornermullu atugassanik atortunik il.il. pilersuineq inatsimmut ilaalneri,
- najukkani pissutsit najukkanilu tunngaveqarneq suliakkiinissamut piumasaqaatinut ilaalersinneqarsinnaaneri,
- soqutigisaqatigiit akerleriinneri pillugit malittarisassat ilanngunneqarneri,

- annertuunik inatsisinik unioqutitsisoqartillugu imaluunniit annertuunik sumiginnaasoqartillugu neqerooruteqartut peqataajunnaarsinnissaat pillugu malittarisassat ilanngunneqarneri,
- nassuiaatit oqaasertaliussallu pisariinnerulersinneri, kiisalu
- ilinniartut, ilinniarnermilu atatillugu suliffimminiittut il.il. pillugit malittarisassanik aalajangersaanissamut Naalakkersuisut piginnaatinneqarnerat annertusineqarluni.

2. Siunnersuummi immikkoortut pingaarnertit

2.1. Inatsit atuuttoq aamma siunnersuutip imarisai

Naligiissitsinissamut tunngaviusoq

Inatsimmi atuuttumi assigiimmik pisarnissamik tunngavik aalajangersarneqarpoq, neqeroorutit piareersarnerini ingerlanneqarnerinilu neqeroorutinillu pissarsiniarnermi neqeroortitsisumit tamatigut isiginiarneqartussat. Tamatuma kingunerisaanik neqeroortitsisunit immikkoortitsisoqarnissaanut inerteqquteqarpoq.

Kisiannili naliliisoqarpoq pisuni taamatut najukkami innuttaasunut imaluunniit inuiaqatigiinnut tunngavissaqartillugu naleqqutsillugulu naligiimmik pinninnissamut tunngaviusup qasukkartilaarnissaa pisariaqartinneqartoq.

Tunngavik pingaarutilik taanna annertuumik siunnersuummi allanngortinneqanngilaq, kisianni taamaattoq inuiaqatigiinni akisussaaffeqarnerup mianerinissaanut periarfissamik ammaalluni, ilanngullugu kinaassusersiunnginnissamut tunngaviusoq mianeralugu najukkami allanngoriartortitsinissaq najukkamilu pissutsit.

Inatsisip atuuffissai (§ 1)

Inatsisit atuuttut malillugit inatsimmi illuliassat sanaartugassallu aamma suliassanut tamakkiisumik sanaartortitsinernut kisimik inatsimmi pineqartunut ilaapput.

Naliliisoqarpoq suliqaartuusut illuliortiternernut sanaartornernullu suliassaqaqfimmi ingerlatsisuusut inatsimmi ataatsimi ataatsimoortinneqarnerat, neqeroortitsisumi neqerooruteqartunilu allaffissornikkut, piffissatigut aammalu isumalluutinik atuinissaq eqqarsaatigalugu iluaqutaasussaasoq.

Siunnersuut malillugu inatsit annertusineqarpoq teknikikkut ikiuineq (siunnersuisarnerit pilersaarusiortarnerillu) aamma illuliornermut sanaartornernullu atugassanik atortunik il.il. pilersuineq ilaatinneqalerlutik. Taamaaliornermi illuliassap neqeroortitsivigineqarnerata pingaaruteqartortaannut tamanut ataatsimoortunik maleruagassaqaalersitsisoqassaaq, aammalu illuliortiternernut sanaartornernullu suliassaqaqfimmi suliqaartuusunut pisariinnerulersitsinissaq matuma siuliani nassuiarneqartoq piviusunngortinneqassalluni.

Nassuiaatit (§§ 2-5 a)

Inatsisini atuuttuni taaguutit attuumassutillit inatsisip atuuffissaa, taamaallaat illuliornernik sanaartornernillu suliaqarnermut tunngassuteqartoq, aallaavigalugu nassuiaarneqarput.

Inatsisip atuuffissaannik annertusititsinissamik siunnersuuteqarnermi nassuiaassutit nutarterneqarnissaannik pisariaqartitsissoqalissaaq.

Illuliornermi sanaartornermilu suliaassat, suliariumannittussarsiuussinerit il.il. pillugit taaguutit paasinarnernulernissai pillugit aammattaaq nutarterneqarput.

Illuliornermi sanaartornermilu suliaassat nassuiaassutaat maannamut nalornissutigineqarsimavoq.

Soqutigisaqatigiit akerleriinneri (§ 6 a)

Inatsisit atuuttut soqutigisat aporaanneri pillugit aalajangersakkanik imaqaangillat.

Inuiaqatigiinni ikinnerusuni tamanit ittuni suliamut attuumassuteqarpallaariaannaaneq, tamatumunngalu atasut sunniutaasussat, immikkut eqqumaffiginissaat pingaaruteqarpoq. Tamanna siunnersuummut tunngavigineqarpoq, soqutigisat aporaannerisa, ilanngullugu suliamut attuumassuteqarpallaarneq, iliuuseqarfiginissaat siunertarineqarluni.

Siunnersuummi soqutigisaqatigiit aporaffiisa suussusersinissaannik, pitsaaliornissaannik iluarsiniarnissaanillu neqeroortitsisoq pisussaaffilerneqarpoq, tassunga ilanngullugu neqeroortitsinerup piareersarnerani nalilersuinermiluunniit siunnersortit peqataanerini.

Najukkani pissutsit inuiaqatigiinnullu akisussaaneq (§ 7, imm. 3 aamma § 20, nr. 5)
Naligiissitsinissamat tunngaviusoq pillugu nassuiaatit matuma siulianiittut naapertorlugit pisuni immikkut ittuni naligiimmik pinninnissamat tunngaviusup saneqqunneqarsinnaannginnerata qasukkartinneqarnissaa pisariaqartinneqarpoq.

Siunnersuummi neqeroorutip piareersarnerani tunniussinermilu - najukkani pissutsit najukkanilu tunngaveqarnerup pingaartinneqarnissaannut neqeroortitsisut periarfissaqalerput. Aalajangersagaq inuiaqatigiinnik eqqarsaatiginninnerup ilanngunnissaannut ammaassivoq, soorlu najukkani suliffeqarfinni sulisoqarneq kiisalu ilinniartoqarnissaaq pillugu piumasaqaat.

Periarfissat kisimik pineqarneri erseqqissarneqarpoq, pisussaaffiunngitsoq. Siunertaq tassaavoq unammilleqatigiinneq assigiimmillu pinninnermik tunngaviup pisariaqanngitsumik avaqqutinngikkaluarlugu najukkani suliffinnik suliffeqarfinniillu ikorfartuinissamat ajornanngitsumik naleqqussaaneq.

Partiit Naalakkersuisunik tunuliaqutsiisut akornanni naalakkersuisooqatigiinnissamut isumaqatigiissut naapertorlugu sapinngisamik najukkaneersut amerlanerpaat illuliassanut sanaartugassanullu suliassani akuutinneqartarnissaat, aammalu sineriak tamaat sinerlugu assassornermut suliffeqarfeqqat suliassat allattorsimaffianiittunik suliakkerneqarnerusarnissaat, politikikkut anguniakkatut oqaatigineqarput.

Neqerooruteqartunik peqataajunnaarsitsineq (§§ 13 a aamma b)
Inatsisit atuuttut neqerooruteqartunik mattussinisaq pillugu immikkut aalajangersakkanik imaqaangilaq, kisianni taamaallaat § 15, imm. 3-mi aalajangersagaq atuulluni, taanna malillugu neqerooruteqartup suliassaq naammaginartumik naammassisinnaassanngikkaa annertunerpaatigut ilimanaateqartoq naliliisoqarpat, neqeroortitsisup neqeroorut tigunngissinnaavaa.

Neqerooruteqartut annertuumik inatsisinik unioqutitsisimasut (akiliilluni peqquserlutsitsineq, peqquserlunneq, unammilleqatigiinneq millisillugu niuernikkut isumaqatigiissimanerit, il.il.) neqeroortitsisumit peqataajunnaarsinnissaannik kiisalu akiliisinnaajunnaartoqartillugu, ilungersunartumik sumiginnaasoqartillugu imaluunniit pisortanut annertuumik akiitsoqartillugu peqataajunnaarsitsinissamik periarfissaqarneq pillugu aalajangersakkat annertunerusut siunnersuummi atuutsinneqalerput.

Aalajangersakkanut neqerooruteqartarnermut inatsit isumassarsiorfigineqarpoq, kisianni suliffeqarfiit siusinnerusukkat pisortani neqeroortitsisunut isumaqatigiissutit naammassinissaanni anigorniagassaqartarsimasut mattunnissaannut periarfissanik annertusititsinisaq pisariaqarsorineqarsimavoq.

Tunniussinissamut piunasaqaatit (§ 15)
Inatsimmi atuuttumi inuiaqatigiinnut akisussaassuseqarnerup pingaartinneqarnissaa periarfissiissutigineqaangilaq.

Misilittagarineqarpoq naliliisoqarlunilu neqeroortitsisut taamatut periarfissaqarnissaat pisariaqartinneqartoq. Tamanna tungavissaqartillugu inuiaqatigiinnilu soqutigisanut pingaaruteqartillugu, najukkani innuttaasut inuiaqatigiillu eqqarsaatigineqarnissaat taamaattumik pingaartinneqarsinnaasariaqarpoq.

Tungavissarititaasoq “aningaasaqarnikkut neqeroorut iluaqutissaqarnerpaaq” siunnersuummi annertusitinneqarpoq, taamaalilluni inuiaqatigiinnut akisussaaqataaneq, najukkani pissutsit, piujuartitsineq suliffeqarnikkullu eqqarsaatigisassat erseqqissumik pingaartinneqalerlutik.

Tamanna nutaamik aaqquissuussineruvoq, suliassaqarfimmi politikikkut kissaatigineqartut akuerinissaat siunertaalluni, takukkit matuma siulianiittut nassuiaatit.

Aningaasanut killiliussat naleqqussarsinnaanerlu (§ 20)

Inatsisit atuuttut malillugit suliaqartinniakkat ilisimatereerlugit neqerooruteqartitsinerlut 1,5 mio. kr. aningaasaqarnermut qaffasinnerpaaffissaavoq.

Naliliisoqarpoq aningaasartat taakkua appasippallaartut. Suliassat annikinnerusut amerlasuut tamanut ammasumik suliariumannittussarsiuullugit neqeroortitsivigineqartarnerat tamatuma sunniutigaa, tamatumalu malitsigisaanik tamatumunnga atasumik allaffissornermut isumalluutit pisariaqanngitsumik annertuut atorineqartarput.

Tamanna tunngavigalugu siunnersuutigineqarpoq illuliornermi sanaartornermilu pilersuinernullu il.il. suliaqartinniakkat ilisimatereerlugit neqerooruteqartitsinerit atorineqarnerinut qummut killiliussaq 1,5 mio. kr.-niit 3,0 kr.-nut qaffanneqassasoq. Siunnersortinut suliaqartinniakkat ilisimatereerlugit neqerooruteqartitsinerit pissarsiniarnermut qummut killiliussaq 10,0 mio. kr.-nut inissinneqassasoq siunnersuutigineqarpoq.

Inuiaqatigiinni nunallu ilaani eqqarsaatigisassat tamatumunnga pissutissaqartitsippata najukkani suliffeqarfinnut suliaqartinniakkat ilisimatereerlugit neqerooruteqartitsinissamut periarfissiisumik aalajangersakkamik nutaamik eqqussisoqarpoq. Najukkami pissutit inuiaqatigiinnullu akisussaaffeqarneq pillugit nassuiaatit matuma siulianiittut innersuussutigineqarput.

Lærlingit inuuniarnermilu immikkut piunasaqaatit (§ 35)

Inatsisit atuuttut malillugit ilinniartunut piunasaqaateqarnissamut piginnaatitaanermi taamaallaat ilinniartut pineqartunut ilaatinneqarput, aammalu Naalakkersuisut maleruagassat aalajangersagai unioqutinneqarpata pineqaatissiinissamut inatsimmi tunngavissaqanngilaq.

Siunnersuut malillugu inatsimmi aammattaaq teknikkikkut ikiuunnerup pineqartunut ilaatinneqartussaanaera eqqarsaatigalugu aalajangersakkap sunniutaasumik allanngortinnissaa pisariaqarpoq, taamatullu unioqutitsinerlut pineqaatissiinissamut piginnaatitsissut pisariaqartinneqartutut isigineqarluni.

Sanaartornermi teknikikkullu ikiuinermit ilinniartunut, suliffimmi sungiusarfinnut assigisaannullu piunasaqaatit pillugit malittarisassanik aalajangersaanissamut Naalakkersuisunut tunngavissiineq siunnersuummi annertusineqarpoq. Piunasaqaatit naammassineqannginnerini ullormut akiliutissanik allatigulluunniit ataasiartumik akiliitsinissamik aalajangersaasoqarsinnaavoq.

Atulersitsineq aamma neqerooruteqartarnermut inatsimmut ataqatigiissinera Inatsit 2026-mi juulip aallaqqaataani atuutilernissaa siunnersuutigineqarpoq.

2.2 Inatsisini allani sunniutaasumik allangortitsinerit

Nioqutissanik kiffartuussinernillu pisinermut atatillugu neqeroortitsineq pillugu Inatsisartut inatsisaata ataasiakkaatigut allangortinneqartussanngorneranik siunnersuut sunniuteqarpoq.

3. Pisortanut aningaasaqarnikkut allaffissornikkullu sunniutissat

Siunnersuut pisortani oqartussanut imaluunniit kommunini oqartussanut aningaasaqarnikkut malunnaatilimmik sunniuteqartussatut naatsorsuutigineqanngilaq.

Ingerlanneranut, siunnersuinerimut pilersuinerimullu atasunik malittarisassat katersorneqarnerisa ersarinnerulernerisalu malitsigisaanik allaffissornikkut oqinnerulernissaa naatsorsuutigineqarpoq.

4. Inuussutissarsiutinik ingerlataqartunut aningaasatigut allaffissornikkullu sunniutissat

Siunnersuut inuussutissarsiutinik ingerlataqartunut aningaasatigut sunniuteqartussaanngitsutut nalilerneqarpoq.

Siunnersuinerimut pilersuinerimullu inatsisip atuuffiata annertusineqarnera naatsorsuutigineqarpoq pitsaanerusumik ammanerusumillu pissuseqarnermik kiisalu aqutsinerup eqaannerulerneranik pisariinnerulerneranillu pilersitsinissaa naatsorsuutigineqarpoq. Peqatigisaanik najukkani pissutsit inuiaqatigiinnilu immikkut piunasaqaatit ilanngunneqarnissaannut periarfissaqarnerup najukkani suliffeqarfinni sulisoqarneq pitsaanerulersissinnaallugu.

5. Avatangiisinut, pinngortitamut inuillu peqqissuunissaannut sunniutissat

Siunnersuut avatangiisinut pinngortitamulluunniit toqqaannartumik kinguneqartussaanngilaq.

Tunniussinissamat piunasaqaatini piujuartitsinerup inuiaqatigiinnullu akisussaannerup ilanngunneqarnissaannut periarfissiisoqarneratigut taamaattoq avatangiisinut isumalluutinillu atuinerimut toqqaannangitsumik pitsaasunik sunniuteqarnerit anguneqarsinnaassapput.

6. Inuit pisinnaatitaaffii aamma innuttaasunut kingunerisassat

Siunnersuut innuttaasunut aningaasaqarnikkut allaffissornikkullu sunniuteqassanngilaq. Siunnersuut maannakkut inuit pisinnaatitaaffiitut sunniuteqassanngilaq.

Siunissami ungasinnerusumi najukkani sulisoqarneq ilinniarnissamullu periarfissat pitsaanerulersinnaasut naatsorsuutigineqarsinnaavoq, tamannalu inuiaqatigiinnikkut ataqatigiissitsinerimut iluaqutaasinnaalluni.

7. Nunanut allanut atassuteqarfinnut nunallu immikkoortuini politikkimut sunniutaasussat, kiisalu sunniutissat allat

Siunnersuutip qulaani eqqaaneqartut saniatigut inatsisitigut imaluunniit inuiaqatigiinni annertuumik kinguneqartitsinissaa naatsorsuutigineqanngilaq. Siunnersuut aammattaaq nunanut allanut atassuteqarfinnut imaluunniit nunap immikkoortuini politikkimut sunniuteqassanngitsoq naliliisoqarpoq.

8. Oqartussanut kattuffinnullu il.il. tusarniaaneq

Siunnersuut piffissami 23. jan. – 23. feb. 2026 tusarniaanernut nittartakkami uani [www.naalakkersuisut.gl] tamanut tusarniutigineqarsimavoq aamma tusarniaaffigineqartartunut ukununga toqqaannartumik nassiuuneqarsimalluni:

Aningaasaqarnermut Akileraartarnermullu Naalakkersuisoqarfik, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik, Isumaginninnermut, Suliffeqarnermut Nunamullu Namminermt Naalakkersuisoqarfik, Ilinniartitaanermut, Kulturemut, Timersornermut Ilageeqarnermullu Naalakkersuisoqarfik, Kommune Kujalleq, Kommuneqarfik Sermersooq, Qeqqata Kommunia, Kommune Qeqertalik, Avannaata Kommunia, Sulisitsisut (GE), Nunaqavissut Suliffiutillit Kattuffiat (NUSUKA), Sulinermik Inuussutissarsiuqartut Kattuffiat (SIK), Atuisoqarnermut Unammilleqatigiinnermullu Aqutsisoqarfik, CSR Greenland, Transparency International Greenland, Nunatsinni Advokatit, INI A/S, Iserit A/S, Nukissiorfiit, KNI A/S, Greenland Airports A/S, Royal Greenland A/S, Sikuki Nuuk Harbour A/S, Tusass A/S.

Tamanut ammasumik tusarniaaneq inatsisissamut siunnersuummi oqaatsitigut teknikkinullu tunngasutigut annikinnerusunik naqqiissuteqarnissamut pissutissaqalersitsivoq. Ilanngussaq 2 innersuussutigineqarpoq, tassani tusarniaanernut akissuteqaatit sammineqarmata.

Inatsisissatut siunnersuummi aalajangersakkanut ataasiakkaanut nassuiaatit*§ 1-imut*

Nr. 1-imut

Inatsisip atuuffia pillugu § 1, imm. 1-imi aalajangersagaq annertusineqassasoq siunnersuutigineqarpoq, taamaalilluni illuliornermi sanaartormilulu suliasat ingerlannissaanut ingerlannerinulluunniit neqeroorutinik pissariniarneq inatsimmi kisimi pineqarnani, kisianni aamma:

1. illuliornermut sanaartormullu teknikikkut siunnersuineq (siunnersuinermi akiliutit), aamma
2. illuliornermi sanaartormilulu atugassanik atortussanik il.il. pilersuinermut.

Allannguinermi siunertaavoq illuliornerup sanaartormerullu iluini suliasanut pilersuinerinilu suusinnaasunut tamanut neqeroorutinik pissarsiniarnermut malittarisassat katersorneqarnissaat. Neqerooruteqartarnermut inatsimmi malittarisassaliornerit katersorneqarnerisigut pisortani sanaartortitsisunut aqutsineq pisariinnerulersillugulu paasiuminarnerulersissavaa, aamma suliffeqarfinnut illuliornermik sanaartormerimillu ingerlataqartunut malittarisassat ataqatigiissinnerulersillugit. Tassalu suliasat neqeroortitsivigineqartussat annertusitineqarnerat tassani pineqanngilaq, tassami pilersuutit teknikkikkullu ikiuunnerit Neqerooruteqarnermut inatsisip allanngortinneqarnissaa siunnersuutigineqartoq sioqqullugu, neqerooruteqartarnermut inatsimmi pineqartunut ilaammata.

Nr. 2-mut

§ 2-mi *illuliorneq sanaartormerlu* pillugit nassuiaat annertusineqarpoq erseqqissarneqarlunilu.

Ingerlatat ilaatinneqartut tamakkiinerusumik allaaserineqarneri ikkunneqarpoq, tassunga ilanngullugit sanaartugassanik sanaartorneq allannguinerluunniit, isaterineq piiaarnerlu kiisalu iluarsaassinerit aserfallatsaaliinerillu. Siunertaq tassaavoq erseqqissaanissaq, assersuutigalugu suliasaq aalajangersimasumik annertussuseqarpat aserfallatsaaliinermi suliasat ilaatinneqartut. Aammattaaq killingata nalinga 500.000 kr. pillugu matuma kingulianiittut takukkit.

Erseqqissarneqarpoq ”illuliornermut sanaartormerullu” nassuiaassutip allanngortinneqarnissaa siunnersuutigineqartoq, suliaqarnernik imaluunniit suliasanik taaguummi pineqartunut ilaasutut isigineqartussanik annertusititsinerunngitsoq. Taamaallaat taaguutininik erseqqissaaneq tassani pineqarpoq, suliarineqartussat suliasallu qanoq ittut Neqerooruteqartarnermut inatsimmi pineqartunut ilaanersut, erseqqissartussaassallugit.

Sulianut inatsimmut ilaasunut imaluunniit ilaanngitsunut killiliussat sulinerit akiligassanngortitat pillugit nassuiaammi annertuutigit nassaarineqarsinnaapput, tak. § 8. Taanna malillugu suliassat kr. 500.000 tikillugit naleqartut tamanut ammasumik neqeroortitsinissamut pisussaaffik pineqartunut ilaatinneqanngillat. Suliassat 500.000 koruunit inorlugit nalillit, suliaqarnermut akiligassiilluni tamatigit suliarineqarsinnaapput.

Suliaqarnerup nalinga kr. 500.000-nit qaffasinneruppat, suliaqarnerit pingaarnertigit illuliornermik sanaartornermillu suliaqarnermut nassuiaassutip iluaniilluni takuneqarsinnaasussaapput. Tassani pineqanngilaq nalinginnaasumik ulluinnarni ingerlatsineq, pingaarnertigit timitalimmik inerreqartanngitsoq. Assersuutigalugu tassaasinnaavoq igalaanik qillersaaneq imaluunniit naasunik killuineq.

Illuliornermik sanaartornermillu suliaqarnermut nassuiaassummi ilaatinneqarput nunaminertami suliaqarnerit, assersuutigalugu sanaartorfi, arsaattarfik imaluunniit golfertarfik, aammalu imaani suliaqarnerit, taakkualu assersuutigalugu tassaasinnaallutik umiarsualiviup imartaani sanaartukkat aalaakkaasut.

Nr. 3-mut

§ 2 a-mi nutaami soqutigisaqatigiit akerleriinneri pillugit nassuiaat ikkunneqarpoq.

Aalajangersagaq neqeroortitsisut taakkulu siunnersortii neqeroortitsinerup ingerlanerani kinaassusersiunnginnermut sunniuteqarsinnaasuni aningaasaqarnikkut inuttulluunniit soqutigisatigit inissisimalernissaannik pitsaaliussaaq.

Assersuut ataaseq tassaasinnaavoq siunnersortaasup neqeroortitsisutut imaluunniit allatigit neqeroortitsinerup inerneranut sunniuteqarsinnaasumik soqutigisaqarsinnaanera.

Inuit eqimattani marlunniittut suliassamut attuumassuteqarpallaarnermik eqqugaasinnaapput: tassani pineqarput inuit neqeroortitsinermut suleriaatsimi toqqaannartumik akuusut, aammalu inuit tassani toqqaannartumik peqataanatik suleriaatsip inerneranit sunnerneqarsinnaasut. Inuit inummot suliap ingerlanerani akuusumut aqutsinissamut piginnaatitaappat, tamanna assersuutigalugu pisinnaavoq.

Aalajangersagaq pisortat ingerlatsineranni suliassanik suliarinnittarnej pillugu Inatsisartut inatsisaanni kapitali 2-mut, suliassamut attuumassuteqarpallaarnermut tunngassuteqartumut, ataqatigiissillugu isigineqassaaq. Tassunga atatillugu oqaatigineqassaaq, soqutigisat aporaannerat pillugu maleruagassat isiginiarneqarnissaanni, nalinginnaasumik suliamut attuumassuteqarpallaannginnissamut maleruagassanik atuinissamik killiliinngitsoq, takuuk pisortat ingerlatsineranni suliassanik suliarinnittarnej pillugu Inatsisartut inatsisaat.

Nr. 4-mut

§ 3, imm. 1-imi taaguut suliariumannittussarsiuussineq erseqqissarneqarpoq, taamaalilluni ileqquumsumik illuliornermik sanaartornermik neqeroortitsineq, teknikikkut ikiuinnermut tunngasunik neqeroortitsineq kiisalu illuliornermut sanaartornermullu atortussanik il.il. pilersuinerit nassuiaammut ilaalerlutik.

Nr. 5-imut

Taakku saniatigut § 3, imm. 2-mi aalajangersarneqarpoq tamanut ammasumik suliariumannittussarsiuussinermi siunissami pisortat suliariumannittussarsiuussinermi nittartagaatigut pisarnissaanut kajumissaasoqarpoq, tamatumalu tusagassiuutitigut ussasaarinissamut innersuussisarneq taarserlugu. Tamatuma ullutsinnut naleqqunnerusumik assigiinnerusumillu tamanut saqqummiussisarnissaq qulakkeerpaa.

Kisianni neqeroortitsisup tamanna naleqquttutut isigippagu, pisortat ataatsimoorlutik neqeroortitsinerimut nittartagaanni allagarsiisussaataaneq, tusagassiuutini allani, naqitani taamatullu qarasaasiatigoortuni, allagarsiinerimik neqeroortitsisup ilassusiinissaa akornutissaqanngilaq.

Nr. 6-imut

§ 5 sunniutaasumik iluarsineqarpoq, taamaalilluni sinaakktissanut isumaqatigiissutit suliassanut inatsimmi pineqartunut ilaasunut tamanut tunngasuussallutik. Allangortitsisoqarpoq, tassani atuuffissaasa annertusitinneranni *suliassanut* § 5 a-mi nassuiarneqartutut (takuuk nr. 7) neqerooruteqartitsineq, neqerooruteqartarnermut inatsimmi pineqartunut ilaatinneqalerluni. Taaguut *sinaakktissanut isumaqatigiissut* aammalu pissutsit suut sinaakktissanut isumaqatigiissummi ilaatinneqarsinnaasut, allannguuteqartinnagit ingerlateqqinneqarput.

Sinaakktissanut isumaqatigiissutit erseqqinnerusumik nassuiarneqarnissaannut nassuiaatit, sanaartornermi neqerooruteqartitsisarneq pillugu Inatsisartut inatsisaata piareersarlugu suliarineqarneranut ilaatillugu suliarineqartut, innersuussutigineqarput.

Nr. 7-imut

Aalajangersagaq nutaaq (§ 5 a) ikkunneqarpoq, tassani nassuiarneqarluni suliassaq tassaasoq illuliornermi sanaartornermilu suliassaq, illuliornermi sanaartornermilu teknikikkut siunnersuinerit aamma illuliornermi sanaartornermilu atugassanik atortussanik pilersuinerit.

Nassuiaat allangortinneqartoq pisariaqarpoq, inatsisip atuuffiata siunnersuutigineqartutut annertusineqarnera (tak. nr. 1) naapertorlugu sullissinernut assigiinngitsunut pingasunut tamanut inatsit atuummat.

Nr. 8-mut

Soqutigisaqartut akkerliinnerinik passussineq pillugu aalajangersagaq nutaaq (§ 6 a) ikkunneqarpoq.

Suliakkiisoq suliariumannittussarsiuussinerup naammassineqarneranut atatillugu soqutigisat akkerliissutaasut suussusernerinik, pitsaaliornissaannik ikiuuffiginissaannullu tulluartumik piareersaateqarsimassaaq. Ammasumik pissuseqarnissaq pillugu piumasqaammut aalajangersagaq ikorfartuivoq aamma inuit imaluunniit siunnersortit inuttut aningaasaqarnikkulluunniit soqutigisaat aalajangiiniarnernut sunniuteqarsinnaanerat pinngitsoortinniassallugu imaluunniit neqeroortitsinermut peqataajunnaarsinneqarsinnaallutik.

Neqerooruteqartut tamarmik assigiimmik inissisimanissaat paasissutissanillu assigiittunik periarfissaqarnissaat neqeroortitsisup anguniassavaa. Neqeroorutip piareersarnerani peqataaneq pissutigalugu suliffeqarfik siunnersuisartoq suliassaq pillugu immikkut ilisimasaqarpat paasissutissat taakku neqerooruteqarsinnaasunut allanut apuunneqarnissai neqeroortitsisup qulakkiissavaa, piffissarlu neqeroortitsiviusoq pissutsit aalajangersimasut eqqarsaatigalugit aalajangersarneqassalluni. Suliffeqarfik siunnersuisartoq pineqartoq neqerooruteqarsinnaasunut allanut naammattumik naligiissinneqarsinnaanngippat aatsaat suliffeqarfik siunnersuisartoq neqeroortitsinermit peqataasinnaajunnaarsinneqassaaq.

Nr. 9-mut

§ 5 a-mi (takuuk nr. 7) nassuiarneqartut suliassanut neqeroorutininik pissarsiniarnerit ilaatilerlugit inatsisip allanngortinneqarnerata malitsigisaanik § 7, imm. 1-imi aalajangersagaq allanngortinneqarpoq.

Tamanna isumaqarpoq neqerooruteqartarnermut inatsimmi malittarisassat atortinneqassasut, suliffeqarfiup suliaqarnera, teknikikkut ikiuina imaluunniit atortussanik pilersuineq pineqarneris apeqqutaatinnagu.

Nr. 10-mut

§ 7, imm. 3-mi aalajangersakkamik siunnersuutigineqartut allannguinermi kinaassusersiunngitsumik, piviusorsiortumik immikkoortitsiviunngitsumillu tunngaveqarluni neqerooruteqartussanik toqqaasoqarnissaa erseqqissarneqarpoq, kisianni aamma neqeroorutip aaqqissuunnerani neqeroortitsisoq najukkani pissutsinik najukkanilu tunngaveqarnissap pingaartinnissaannut pisussaaffeqarmat.

Allannguinissamut siunnersuut, taamaalilluni neqerooruteqartunik toqqaanermi najukkani pissutsit najukkamilu tunngaveqarnerup ilaatinneqarnissaannut periarfissiisoqarnera, periarfissatut paasineqassaaq, pisussaaffiunngitsoq. Siunertaq tassaavoq naleqquffiini assersuutigalugu nunaqarfinni illoqarfinniluunniit inuusutissarsiorinikkut killeqartumik piginnaasaqarfiusuni neqeroortitsinermit inuiaqatigiinni eqqarsaatigisassat ilanngunneqarnissaannut pisunilu allani pingaarnertigut kinaassusersiunngitsumik

eqqarsaatiginninnissamut pissutissaqartuni naleqqussaasinnaaneq aammalu pisariaqanngitsumik unammilleqatigiinnerup naligiimmillu pinninnissamut tunngaviusoq qaangiinnarneqassanngitsut.

Kinaassusersiunngitsumik eqqarsaatiginninnissaq paasineqassaaq, najukkani imaluunniit nunami namminerimi soqutigisat inuiaqatigiinnut tunngassuteqartut pingaarutillit eqqarsaatigineqarnissaat. Assersuut tassaasinnaavoq inoqarfinni minnerusuni annertuumik suliffissaaleqineq aamma/imaluunniit sanasut suliffeqarfiata assigisaataluunniit suliassaaleqinera, najukkami innuttaasunut malunnaatilimmik sunniisumik, annertussuseqartoq. Assersuutissaq alla tassaasinnaavoq, misilittakkat atorineqarnissaat najukkanilu ineriartortitsinissaq qulakkeerniarlugu suliassaq suliffeqarfimmit nunaqavissumit suliarineqarnissaa kissaatigineqartoq.

Siunertaavoq najukkameersut sapinngisamik amerlanerpaat akuutinneqarnissaannut periarfissamik qulakkeerinissaq aammalu sinerissami suliffeqarfiit minnerusut suliassaqarnissaannik qulakkeerinissaq, kisianni aamma najukkami inissisimatitsinissaq aammattaaq isiginiarneqassalluni.

Nr. 11-mut

Siunnersuutip aamma kingunerisaanik ataatsimut piunasaqaatit suut akuerineqarsimanersut pillugit Naalakkersuisut ukiukkaartumik tamanut saqqummiussisassapput nutaat imaluunniit nutarterneqarsimasut ingerlaavartumik tamanut saqqummiuttassallugit.

Neqeroorteqartumut ajugaasumut isumaqatigiissut ataatsimoortumik piunasaqaatit Naalakkersuisut akuerisimasaat malillugit suliarineqassasoq, aalajangersakkami aalajangersarneqarpoq. Ataatsimoortumik piunasaqaatit neqeroortitsinerup tamanut saqqummiunneqarnerata nalaani Naalakkersuisunit akuerineqarsimasut kingulliit neqeroortitsisup atussavai. Neqeroortitsinerup tamanut saqqummiunneqareernerani ataatsimoortumik piunasaqaatit allannguuteqarpata, neqeroortitsineq ingerlasoq aammalu isumaqatigiissut isumaqatigiissutigineqartoq, ataatsimoortumik piunasaqaatinik neqeroortitsinermut najoqqutassani innersuussutigineqartumik, suli aallaaveqassapput.

Neqeroortitsinerup tamanut saqqummiunneqarnerata kingorna neqeroortitsinermut piunasaqaatini neqeroortitsisoq annikitsuinnarmik allanngortitsisinnaavoq. Allanngortitsinerni annertunerusuni nutaamik neqeroortitsisoqartussaassaaq.

Nr. 12-imut

Tamanna tunngavissalimmik siunertamut iluaqutaassappat, aatsaat ataatsimoortumik piunasaqaatit saneqqunneqaqqusaapput, aammalu allannguutit neqeroortitsinermut najoqqutassani ersarissumik allassimassapput. Tamatuma atuunnerani, atuinissaq

tunngavissalimmik tunngavilersorneqarpat, neqeroortitsisup nunani allani malitassat akuerisaasut atorniarlugit toqqarluarsinnaavaa.

Nr. 13-imut

§ 8, imm. 1-imi aalajangersagaq inatsimmi allannguutissatut siunnersuutigineqartut malitsigisaasa kinguneraat (takuuk nr. 7).

Nr. 14-imut

§ 12-mi aalajangersagaq tulluarsarneqarpoq, taamaalilluni neqerooruteqarnissamut piukkunnaateqartunik toqqaanissamut nalunaaruteqarnissaq pillugu piumasaqaat pisortat neqeroortitsinermi nittartagaannut innersuussilluni.

Nr. 15-imut

§ 13-imi aalajangersagaq inatsimmi allannguutissatut siunnersuutigineqartut malitsigisaasa kinguneraat (takuuk nr. 7).

Nr. 16-imut

§§ 13 a aamma 13 b-mi siunnersuutigineqarpoq neqerooruteqartut ilaatikkunnaarnissaat pillugu malittarisassanik ikkussisoqassasoq.

- § 13 a-mi neqeroortitsinerup ukiut tallimat kingullit iluanni ilungersunartumik inatsisinik unioqutitsisimasut suliffeqarfiit neqeroortitsisumit peqataanissamut mattunneqassapput (akiliilluni pinerluuteqarneq, peqquserlunneq imaluunniit niuernikkut isumaqatigiinnernik ingerlataqarneq, aningaasanik peqquserlunnikkut pissarsiarisimasanik malunnarunnaarsaneq peqqarniissaarniartarnernut aningaassaliissuteqartarneq il.il.).
- § 13 b-mi assersuutigalugu suliffeqarfik akiliisinnaajunnaarsinnaasutut suliarineqarpat, inuussutissarsiutimi ingerlannerani annertuunik sumiginnaasimappat, paasissutissanik eqqunngitsunik piaaraluni tunniussisimappat imaluunniit pisortanut annertuunik akiitsoqarpat neqeroortitsisumit peqataajunnaarsinneqassaaq.

§ 13 a malillugu mattussinissamut tunngaviusut malinneqannginnissaat neqeroortitsisup toqqarsinnaanngilaa, aammalu neqerooruteqartoq § 13 a malillugu mattussinissamut tunngaviusuni pineqartunut ilaasoq neqeroortitsinermi peqataasinnaanngilaq.

Mattussinissamut tunngaviusut § 13 b-mi pineqartunut ilaasut neqeroortitsinermi tamakkiisumik ilaannaasumilluunniit atorniarlugit neqeroortitsisup nammineerluni aalajangersinnaavaa. Neqerooruteqartoq mattussinissamut tunngaviusuni pineqartunut ilaasoq, neqeroortitsinermi tassani peqataasinnaanngilaq.

Sumiginnaanerup neqerooruteqartup inuussutissarsiutiminik ingerlatsinerata nalaani pisup ilungersunartuuneranut assersuutissat, ilanngullugu attaveqarnissap annertuumik

sumiginnameqarnera, tassaasinnaavoq neqeroortitsisup aamma neqerooruteqartup akornanni akerleriittoqalernera, makkua malitsigisaannik

- neqeroortitsisup taarsinissaq imaluunniit iluarsinissaq pillugu piumasagaataasa amigartumik qisuariarfigineqarnera imaluunniit qisuariarfigineqannginnera,
- isumaqatigiissitsiniarnermut suliassaq ingerlasoq,
- isumaqatigiissitsiniarnermut suliassami eqqartuussut.

Neqerooruteqartoq, assersuutigalugu iluornoornini uppersarlugu mattussinissamut tunngaviusuni pineqartunut ilaanani paasissutissiippat, neqeroortitsisoq tamatuma erseqqinnerusumik misissornissaanut pisussaaffeqanngilaq. Kisiannili eqqortuunera nalornissutigineqarpat, neqeroortitsisup tassunga tunngasoq erseqqinnerusumik misissussavaa.

Neqeroortitsisup tamanna naleqquttutut isigippagu, neqeroortitsisup neqerooruteqartut tamaasa misissornissaannut pisinnaatitaavoq.

Piffissamut killigitiitap naanerani, imaluunniit piukkunnartussarsiuussilluni neqeroortitsinermi qinnuteqarnissamut piffissamut killigitiitap naanerani, pissutsit mattussinissamut tunngaviusuni pineqartunut ilaasut neqerooruteqarnissamut pingaaruteqassapput.

Aalajangersakkat pisortat neqeroortitsineranni qaffasissumik ileqqorissaarnikkut malitassaqarnermut iluaqutaassapput, aamma unammilleqatigiinnermi atukkanik assigiilersitsissallutik.

Nr. 17-imut

Piumasagaat “aningaasaqarnikkut iluatinnarnerpaaq neqeroorut” annertusineqarpoq, taamaalilluni erseqqissumik uku pingaartinneqassallutik:

- najukkani pissutsit najukkanillu tunngaveqarneq,
- inuiaqatigiinnut akisussaaqataaneq,
- ilinniartunut, ilinniarnermut aamma suliffimmi misiliisussanut inissamik pilersitsineq,
- inuit atugarliortut sulilersinneri kiisalu
- avatangiisinut sunniutit.

Najukkami inissisimaneq paasineqassaaq tassaasut pissutsit piviusumik uppersarneqarsinnaasumillu suliassap suliarineqarneranut atasut, assersuutigalugu tunngavissarititaasut annertoqqatigiippata aammalu neqeroortitsinermut najoqqutassani ersarissumik nassuiarneqarsimappata, najukkami najuunneq, najukkameersunik sulisoqarneq imaluunniit najukkameersunik pilersuisussanik suleqateqarneq.

Inuiaqatigiinni akisussaaffeqarneq tassunga atatillugu paasineqassaaq tassaasoq, mianerisassat kinaassusersiunnginnermut isumaqatigiissummullu attuumassutillit, ilanngullugu

ilinniartoqalernissaq, ilinniarfissamik sungiusarfissamillu pilersitsineq, ajornartorsiortunik suliffissaqartitsineq kiisalu avatangiisini mianerisassat.

Siunertaq tassaavoq, tamatumunnga tunngavissalimmik pissutissaqartillugu, neqeroorutip pitsaassusaanik taaguutip annertusineqarnissaanut neqeroortitsisumut naleqqussaatsinissaq taamaalillunilu inuiaqatigiit eqqarsaatigineqarnerisa ilanngunneqarneri.

Inuiaqatigiinni mianerisassat pingaartumik, kisianni taannaannaanngitsoq, najukkameersunik sulisoqarluni piginnaasanillu inerisaalluni, suliassap sularineqarneranut ilaatillugu nukittorsarneqarsinnaasunik, pisoqarnerani , naleqquususaapput.

Assersuutigalugu tunngavissarititaasup atorneratigut pisariaqanngitsumik mingutsitsinissaq pinngitsoortinneqarsinnaalluni pisoqartillugu, avatangiisit mianerineqarnissaat ilanngutsinneqartussaassaaq.

Nr. 18-imut

§ 20-mi aalajangersagaq, pisuni suni neqeroortitsisup suliaqartinniakkat ilisimatereerlugit neqerooruteqartitsisinnaaneraniq malittarisassaqartitsisoq, taaguutinut nutaanut tulluusaavoq (tak. ilaatigut nr. 7) aamma erseqqissarneqarluni.

Suliaqartinniakkat ilisimatereerlugit neqerooruteqartitsinerup qanoq ilinerani pissarsiariniarneqarnissaanut aningaasanut qummut killiliussat 1,5 mio. kr.-niit 3,0 mio. kr.-nut qaffanneqassasut siunnersuutigineqarpoq. Siunnersortinut akiliutit eqqarsaatigalugit aningaasanut qummut killiliussat 10 mio. kr.-unerat aalajangiussimaneqarpoq (aalajangersakkami nr. 1).

Nr. 5-imi aqutissamik nutaamik atuutsitsilersoqarpoq, taanna malillugu inuiaqatigiinnik eqqarsaatiginninneq - tassunga ilanngullugit najukkani pissutsit aamma najukkamik tunngaveqarneq - suliaqartinniakkat ilisimatereerlugit neqerooruteqartitsinerit atornerarnerinut tunngaviusinnaallutik. Siunertaavoq, tamanna tunngavissalimmik tunngavilersorneqarluni aammalu annertoqqatigiissinneqarluni pisoqartillugu, aammalu najukkameersunik sulisoqarnissaq sapinngisamik annertunerpaamik eqqarsaatigalugu pisoqartillugu, suliffeqarfiit najukkameersut salliutinissaannut periarfissaqalersitsinissaq. Aalajangersagaq unammilleqatigiinnerup naligiissitsinissamullu tunngaviusup mianerinissaannut sanilliullugu nalilersorneqassaaq.

Nr. 19-imut

§ 24, imm. 3-mi neqeroortitsisoq (noqqaasoqarneratigut) neqeroorutip itigartinnissaanut tunngavilersuutit pillugit neqerooruteqartumut pineqartumut ilisimatitsissappat mattussinissaq pillugu aalajangersakkanut nutaanut (§§ 13 a aamma b) innersuussineq ikkunneqarpoq.

Nr. 20-mut

§ 25, imm. 1-imi aalajangersagaq nutarterneqarpoq, taamaalilluni siumoortumik nalunaarutiginninnernik tamanut ammasumik nalunaaruteqarneq pisortat neqeroortitsinermi nittartagaatigut pisassalluni.

Nr. 21-mut

Neqeroorutini aalajangersimasumik pissarsiniarnissamut siumoortumik nalunaaruteqarnerit tamanut ammasumik nalunaarutiginnissaannut piffissaliusseq sapaatit akunnerinit arfineq pingasuniit sisamanut sivikillineqarpoq (§ 25 a, imm. 4).

Allanquineq, piffissaliusseq siumoortumik nalunaaruteqarnerit pillugit naammagittaalliuuteqarnissamut piffissaliussamut naapertuutilerluni, sioqqutsisumik nalunaaruteqarnerit atornissaasa sunniuteqarluarnerulersinnissaa siunertaavoq.

Ataasiakkaatigut neqerooruteqartitsinermut piffissamut killigititaq atuuttoq pissusiviusuni suliassamik kinguaattoortitsinerinnaavoq. Soqutiginnittut sapaatit akunnerisa 4-at iluanni soqutiginninnerminnik ajornartorsiutaanngitsumik nalunaarutiginnissinnaapput, aammalu naammagittaallioornissamut periarfissaq, killissarititaasup sapaatit akunnerisa 4-at qaangiunnerata iluani periarfissaassalluni.

Nr. 22-mut

Aalajangersakkami atuuttumi illuliornermik sanaartornernillu suliaqarnermi ilinniartunut piumasagaatinik aalajangersaanissamut Naalakkersuisut piginnaatinneqarput.

§ 35, imm. 1-imi aalajangersakkap imatut allanngortinnissaa siunnersuutigineqarpoq illuliornerit sanaartukkallu suliarineqarnerinut atatillugu aamma taakkununga teknikikkut ikiuunnermi ilinniartut, suliffimmi sungiusartut pillugit Naalakkersuisut maleruagassiornissamut piginnaatitaanerata annertusineqarluni. Tamanna aalajangersakkap teknikkinut siunnersuineq ilaatilerlugu annertusitinneqarnerata kinguneraa, taamatullu illuliornermik inuussutissarsiortut suliffimmi sungiusartoqartarlutik, assersuutigalugu ingeniorinngorniarlutik ilinniartut, sivirusumik ingerlaqqiffiusumik ilinniartuusut.

Tamatuma saniatigut malittarisassat eqqortinneqanngippata ullormut akiliititsinissamik imaluunniit ataasiartumik akiliisitsinissamik aalajangersaasinnaanermut periarfissaq ikkunneqassasoq siunnersuutigineqarpoq. Akiliisitsinissaq assigisaalluunniit pisariaqartinneqanngitsutut isigineqarpoq. Tamatumunnga taarsiullugu, ullut ataatsimik arlalinnilluunniit ilinniartoqanngiffiusut tamaasa ullormut akiliisitsiviusassasut imaluunniit ilinniartumut amigaataasumut ataatsimut ataasiartumik akiliisitsiviusassasut siunnersuutigineqarpoq.

Suliffeqarfiit ilinniartunut isumaqatigiissummi isumaqatigiissutigineqartumi amigaataasunut tamanut immikkut akiligassiisummik aningaasarsiat 150 %-iisut annertussusilimmik sanatitsisumut akiliissasut, Naalakkersuisut assersuutigalugu aalajangersinnaassavaat.

Siunertaavoq suliffeqarfiit ilinniartut il.il. amerlassusissaat pillugu piunasaqaammik isumaqatigiissutigineqartumik naammassinninnissamut kajumissuseqalersinnissaat.

Tamatuma saniatigut ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat innersuunneqarpoq.

§ 2-mut

Nr. 1-imut

Illuliornermik sanaartormillu suliaqarnermut teknikkikkut ikiorneqarnissamut kiisalu illuliornermik sanaartormillu suliaqarnermut pilersuutitut neqeroortitsineq ullumikkut pisortat oqartussaaffigisaanni suliffeqarfiinilu nioqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaanni (neqerooruteqartitsisarnermut inatsit) maleruagassiivigineqarput.

Siunnersuummi neqerooruteqartarnermut inatsisip atuuffissai annertusitinneqarput, taamaalilluni teknikkikkut ikiorneqarnissamut pilersuutinullu neqerooruteqartitsineq siunissami neqerooruteqartarnermut inatsimmi maleruagassiivigineqassalluni. Neqerooruteqartarnermut inatsisip atuuffissaannik annertusititsineq ataasiakkaatigut siunnersuummi § 1, nr. 1-imi atuutsinneqarpoq, tamannalu pillugu aalajangersakkamut nassuiaatit innersuussutigineqarput. Allatigut nalinginnaasumik siunnersuummut nassuiaatit innersuussutigineqarput.

Tamatuma kingunerisaanik neqerooruteqartitsisarnermut inatsimmi § 2, imm. 3 atorunnaarsinneqarpoq, takukkit matuma kinguliani nr. 2-mut nassuiaatit. Tamatuma malitsigisaanik aalajangersakkami imm. 1-ip allangortinneqarnissaa pisariaqarpoq, taamaalilluni taanna imm. 3-mut (atorunnaarsinneqartumut) innersuussinermik imaqarunnaassalluni.

Nr. 2-mut

Matuma siuliani nr. 1-mut nassuiaatit naapertorlugit neqerooruteqartitsisarnermut inatsimmi § 2, imm. 3 atorunnaarsinneqarpoq. Imm. 3-p atorunnaarsinneqarnerata kingorna neqerooruteqartitsisarnermut inatsit illuliornermik sanaartormillu suliaqarnermi teknikkikkut ikiorneqarnermut atuukkunnaarpoq.

Neqerooruteqartitsisarnermut inatsimmi § 2, imm. 3-p atorunnaarsinneqarnerani, immikkoortut 4 aamma 5 imm. 3-nngorlunilu imm. 4-nngorpoq.

Nr. 3-mut

Taamatuttaaq neqerooruteqarnermut inatsisip atuuffissaata annertusitinneqarnissaannik siunnersuuteqarnerup malitsigisaanik, takukkit matuma siuliani nr. 1-imut nassuiaatit, neqerooruteqartarnermut inatsimmi § 3, nr. 1-imi aalajangersagaq allanngortinneqartariaqalerpoq. Allannngortitsinermi erseqqissarneqarpoq illuliornermik sanaartornermillu suliaqarnerinnaanngitsoq (ullumikkutut), kisianni aamma illuliornermik sanaartornermillu suliaqarnermi teknikkikkut ikiorneqarneq pilersuutillu siunissami neqerooruteqartitsisarnermut inatsimmi ilaatinneqartussaannngitsut.

§ 3-mut

Siunnersuutigineqarpoq Inatsisartut inatsisaat ulloq 1. juli 2026 atuutilissasoq.

Ilanngussaq 1

Siunnersuut inatsisinut atuuttunut assersuullugu	
<i>Oqaasertaliunneqartut atuuttut</i>	<i>Siunnersuutigineqartoq</i>
	§ 1 Sanaartornermi neqerooruteqartitsisarneq pillugu Inatsisartut inatsisaanni nr. 11-mi, 2. december 2009-meersumi, Namminersorlutik Oqartussat nalunaarutaatigut nr. 9, 20. august 2021-imeersukkut allanngortinneqartumi imatut allannguisoqassaaq:
§ 1. Sanaartugassat suliarineqarnissaannut, imaluunniit sanaartugassat pilersaarutitalerlugit suliarineqarnissaannut neqerooruteqartitsisarnermut, aammalu suliaqarnissutinik tunniussisarnermut inatsit atuuppoq.	1. § 1, imm. 1, oqaasertalerneqassaaq imatut: ”Inatsit ukunani neqeroorutinik piniarnermut suliaqarnissutinik tunniussisarnermut atuuppoq: 1) illuliornermi sanaartornissamillu pilersaarusiornernut imaluunniit suliarinerinut, 2) illuliornermut sanaartornermullu teknikikkut ikiuinernut, aamma 3) illuliornermi sanaartornermilu atugassanik atortussanik il.il. pilersuinerneq.”
§ 2. Sanaartornermi suliaqarnissat tassaapput suliaqarnissat, sanaartorfimmi, illumi imaluunniit illuliornermi atortuqarnissutinik suliat timitaannik aalajangersimasunik naammassisaqarnissamik siunertaqarnissut.	2. § 2 imatut oqaasertalerneqassaaq: ” § 2. Illuliornermi sanaartornermilu paasineqarnissutinik suliarinut sanaartorfiusumi, illuliornermi, sanaartukkami, atortumi, nunaminertami imaluunniit imaani aalajangersimasunik tigussaasunik inernerup pissarsiarinissaanik siunertaqartoq. Suliaqarnermi ilaatinneqarnissutinik atortunik sanaartukkanillu sanaartorneq allannguinerluunniit, isaterineq

	aamma ikkussueqqinneq iluarsaassinerlu, kiisalu aserfallatsaaliineq.”
	<p>3. § 2-p kingornagut ilanngunneqarpoq: ” § 2 a. Soqutigisallit akkerliinneratut paasineqassaaq pissutsini inuk, neqeroortitsisoq sinnerlugu iliuuseqartoq, aamma neqeroortitsinerup ingerlannerata naammassiniarnerani peqataasoq, imaluunniit ingerlatsinerup inaarneqarnissaanut sunnuteqarsinnaasoq, toqqaannartumik toqqaannangitsumilluunniit aningaasaqarnikkut, aningaasarsiornikkut allatigulluunniit annertuutigut soqutigisaqartoq, neqeroortitsinerup ingerlanneranut atatillugu pineqartup kinaassusiunnginneranut attaviitsuuneranillu navianartorsiortitsisinnaasoq, imaluunniit inuup attuumassuteqarpallaarneranik kinguneqarsinnaasoq.”</p>
<p>§ 3. Inatsimmi matumani suliariumannittussarsiuussinertut paasineqassaaq, suliassap neqeroortitsivigineqarnerani arlalinnut piffissap aalajangersimasup ataatsip iluani, aammalu neqerooruteqartitsinermi tunngavissat assigiit, imaluunniit atuuttussamik neqerooruteqarnissamat piunasaqaatit minnerpaaffissaat ataatsimoortut, imaluunniit sanaartugassaq pillugu suleqatigiinnissamik pisussaaffiliisumik neqerooruteqarnissaq tunngavigalugit neqerooruteqartitsinerlut. Kaammattuinermi suliariumannittussarsiuussineq pineqartoq nalunaarutigineqassaaq.</p>	<p>4. § 3, imm. 1, oqaaseqatigiit siulliit ima oqaasertaqassapput: ”Inatsimmi matumani suliariumannittussarsiuussinertut paasineqassaaq suliassaq imatut neqeroorutigineqassasoq, piffissap aalajangersimasup ataatsip iluani aamma neqerooruteqartitsinermi tunngavissat assigiit imaluunniit piunasaqaatit minnerpaaffissaat tamanut atuuttut tunngavigalugit arlallit atuuttussamik neqerooruteqassasut, imaluunniit suliassaq pillugu suleqatigiinnissamik pisussaaffiliisumik isumaqatigiissuteqarluni neqerooruteqassasut.”</p>

<p><i>Imm. 2.</i> Tamanut ammasumik suliariumannittussarsiuussinermi tusagassiutitigut naqitatigut imaluunniit elektronik atorlugu tusagassiutitigut allagarsiinikkut kikkunnulluunniit neqerooruteqarnissamut kajumissaarisooqassaaq.</p>	<p>5. § 3, imm. 2, oqaasertalerneqassaaq imatut: ” <i>Imm. 2.</i> Tamanut ammasumik suliariumannittussarsiuussinermi suliassaq pisortat neqeroortitsinermut nittartagaanni nalunaarutigineqassaaq, taamaalillutik neqerooruteqarnissamut soqutiginnittut suliariumannittussarsiuussinernup ilisimaarilernissaanut periarfissaqalissallutik.”</p>
<p>§ 5. Sinaakktissatut isumaqatigiissutitut paasineqassaaq, assersuutigalugu piffissaliussap iluani sanaartugassat assinginut sananeqarsinnaasunut akit, pitsaassutsit amerlassutsillu, imaluunniit annertussutsit eqqarsaatigalugit piunasaqaatinik isumaqatigiissusiorfiusutut.</p>	<p>6. § 5 imatut oqaasertalerneqassaaq: ” § 5. Sinaakktissatut isumaqatigiissutitut paasineqassaaq piffissaliussap aalajangersimasup iluani sanaartugassat assigiit sananeqarsinnaanerinit piunasaqaatit pillugit isumaqatigiissutit, assersuutigalugu akit, pitsaassutsit amerlassutsillu, imaluunniit annertussutsit eqqarsaatigalugit.”</p>
	<p>7. § 5-ip kingornagut ilanngunneqarpoq: ” § 5 a. Suliassatut paasineqassaaq illuliornermi sanaartormilu suliassaq, illuliornermi sanaartormilu teknikikkut siunnersuinerit aamma illuliornermi sanaartormilu atugassanik atortussanik pilersuinerit.”</p>
	<p>8. § 6-ip kingornagut qulequtaq nutaaq ilanngunneqarpoq:</p> <p style="text-align: center;"><i>”Soqutigisat akerleriinneri”</i></p> <p>Qulequttap nutaap kingorna ilanngunneqarpoq: ” § 6 a. Neqerooruteqartitsisoq suliariumannittussarsiuussinernup naammassineqarneranut atatillugu soqutigisat akerleriissutaasut suunerinik,</p>

	pitsaaliornissaannik ikiuuffiginissaannullu tulluurtumik piareersaateqarsimassaaq.”
<p>§ 7. Sanaartugassanik inatsimmi matumani ilaatinneqartunik suliaqarnissamut, imaluunniit pilersaarusiornissamut suliaqarnissamullu neqeroorutit tamanut ammasumik suliariumannittussarsiuussinikkut, imaluunniit killilimmik suliariumannittussarsiuussinikkut, suliaqartinniakkalluunniit ilisimatereerlugit neqerooruteqartitsinikkut pissarsiarineqassapput.</p>	<p>9. § 7, imm. 1, imatut oqaasertalerneqassaaq: ”Inatsimmut matumunnga ilaasumik sanaartugassanik suliaqarnissamut neqeroorutit tamanut ammasumik imaluunniit killilimmik suliariumannittussarsiuussinikkut imaluunniit suliaqartinniakkat ilisimatereerlugit neqerooruteqartitsinikkut pissarsiarineqassapput.”</p>
<p><i>Imm. 3.</i> Neqerooruteqartitsisoq neqerooruteqartitsinissamik piareersaanermi ingerlatsinermilu, aammalu suliakkiissutissamik tunniussinermi pisussaavoq, neqerooruteqartumik toqqaanermi kinaassusersiunngitsumik, piviusorsiorumik immikkoortitsiviunngitsumillu tunngaveqarnissaaq, aammalu neqerooruteqartut akornanni assigiinngissitsisoqannginnissaa isumagissallugu.</p>	<p>10. § 7, imm. 3, imatut oqaasertalerneqassaaq : ” <i>Imm. 3.</i> Neqerooruteqartitsisoq neqerooruteqartitsinissamik piareersaanermi ingerlatsinermilu aamma suliakkiissutissamik tunniussinermi pisussaavoq kinaassusersiunngitsumik, piviusorsiorumik immikkoortitsiviunngitsumillu tunngaveqarluni neqerooruteqartussanik toqqaassalluni aamma neqerooruteqartut akornanni assigiinngissitsisoqannginnissaa isumagissallugu, tassami neqeroortitsisoq kinaassusersiunngitsumik tunngavissarititaasut mianeralugit inuiaqatigiinni akisussaasunngorsinnaammat, ilanngullugu najukkani pissutsit najukkanilu tunngaveqarnissaa eqqarsaatigalugit.”</p>
<p><i>Imm. 4.</i> Neqerooruteqartitsineq atorpeqarsinnaaffiisigut “Kalaallit Nunaanni sanaartornermi suliassanut pilersuinermullu</p>	<p>11. § 7, imm. 4, imatut oqaasertalerneqassaaq : ” <i>Imm. 4.</i> Suliassanik neqerooruteqarnermi Naalakkersuisut akuerisimasaannik, taamatut peqarsimapput, ataatsimut</p>

<p>piumasaqaatit ataatsimoortut (AP)” imaluunniit allagartat allat pisortanit akuerisat naapertorlugit ingerlanneqassaaq.</p>	<p>piumasaqaatit pisortanit akuerineqarsimasut malillugit isumaqatigiissutip suliarineqarnissaa piumasaqaataavoq. Ataatsimut piumasaqaatit allannguisoqarsimappallu suut akuerineqarsimanersut ukiut tamaasa januaarimi Naalakkersuisut tamanut saqqummiussissapput.”</p>
<p><i>Imm. 5.</i> Neqerooruteqartitsineq AP malillugu ingerlanneqarpat, tak. imm. 4, AP-mik saneqqutsinissaq taamaallaat tungavissat immikkut ittut pineqartillugit pisinnaavoq. Saneqqutsinissamut aalajangersakkat pisuni ataasiakkaani neqerooruteqartitsinermut najoqqutassiani erseqqissarneqartassapput.</p>	<p>12. § 7, imm. 5, imatut oqaasertalerneqarpoq: ” <i>Imm. 5.</i> Neqeroortitsisup tamanna kinaassusersiunnngitsumik siunertamut iluaqutaassappat, imm. 4-mi piumasaqaatit ataatsimoorussat saneqqussinnaavai. Allannguutit neqeroortitsinermut najoqqutassani ersarissumik allassimassapput.”</p>
<p>§ 8. Sanaartornermi suliassat suliarinerini akiligassiissutaasartut tamanut ammasumik neqerooruteqartitsisarnermut maleruagassanut ilaatinneqanngillat. Sanaartornermi suliassanut suliarinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit sanaartugassaq annerpaamik 500.000 koruuninik naleqartussaattillugu taamaallaat qaqutigunnaq atorineqarsinnaavoq.</p>	<p>13. § 8, imm. 1, imatut oqaasertalerneqassaaq: ”Suliassat suliarinerini akiligassiissutaasartut tamanut ammasumik neqerooruteqartitsisarnermut maleruagassanut ilaatinneqanngillat. Suliassanut suliarinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit suliassaq annerpaamik 500.000 koruuninik naleqartussaattillugu qaqutigunnaq atorineqarsinnaavoq.”</p>
<p>§ 12. Killilimmik suliariumannittussarsiuussinermi neqerooruteqartitsisoq tusagassiuutit naqitat imaluunniit elektroniskiusut atorlugu tusagassiuutit aqqutigalugit</p>	<p>14. § 12, imm. 1, oqaaseqatigiit siulliit ima oqaasertaqassapput: ” Killilimmik suliariumannittussarsiuussinermi neqerooruteqartitsisoq pisortat neqeroortitsinermut nittartagaatigut neqeroortitsinermik ussassaartutit tamanut</p>

<p>neqerooruteqartitsinissamut allagarsiussamik tamanut ammasumik saqqummiussilluni neqerooruteqarsinnaasunut pilersaaruteqarnermigut piukkunnartussarsiorsinnaavoq. Neqerooruteqartitsinissamut allagarsiussami allassimasussaapput 1) peqataanissamut soqutiginnilluni nalunaarnissamut piffissaliusseq, sivikinnerpaamik ullunik suliffiusunik 15- inik sivisussuseqartusseq, 2) aningaasaqarnikkut teknikkikkullu pisinnaasat pillugit paasissutissat, piukkunnartussarsiornermut ilaanissamut uppersarneqartussat suussusissat kiisalu taakkununga uppersaataissanut piumasaqaatit, 3) suliassaq akikinnerusumik akeqartitsilluni imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq, aamma 4) neqerooruteqartut neqerooruteqarnissamut kajumissaarneqartussat amerlanerpaamik qassiussanersut.</p>	<p>ammasumik saqqummiunneratigut neqerooruteqarsinnaasunik aggersaanikkut piukkunnartussarsiorsinnaavoq.”</p>
<p>§ 13. Killilimmik suliariumannittussarsiuussinerit entreprenørit aalajangersimasut kisimik pisariaqartinneqartumik pisinnaasaqartillugit imaluunniit suliap naammassineqarnissaanut pisariaqartinneqartumik immikkut ittumik ilisimasaqartillugit, piukkunnartussarsiuussinertaqanngitsumik ingerlanneqarsinnaapput. <i>Imm. 2</i> Aammattaq killilimmik suliariumannittussarsiuussinerit siumoortumik neqerooruteqartitsiviunngit-</p>	<p>15. § 13 imatut oqaasertalerneqassaaq: ” § 13. Killilimmik suliariumannittussarsiuussinerit suliffeqarfiit aalajangersimasuinnaat pisariaqartinneqartunik taamaallaat piginnaasaqarpata imaluunniit suliassap suliarinissaanut pisariaqartinneqartumik immikkut ittumik ilisimasaqarpata piukkunnartussarsiuussinertaqanngitsumik ingerlanneqarsinnaapput. <i>Imm. 2.</i> Killilimmik suliariumannittussarsiuussinerit nunap ilaani pissutsit kingunerisaannik najukkani</p>

<p>sumik ingerlanneqarsinnaapput, nunap immikkoortuani pissutsit pequtaallutik entreprenørit najugaqartut kisimik neqerooruteqarsinnaanissaat naatsorsuutigineqartillugu, aammalu killilimmik neqerooruteqartitsinissamut § 25 a, imm. 4 naapertorlugu aggersaasoqarsimatillugu.</p>	<p>suliffeqarfiit kisimik neqerooruteqarnissaat naatsorsuutigineqarpat, aamma § 25 a, imm. 4 malillugu killilimmik suliariumannittussarsiuussinermut aggersaasoqarsimappat aamma piukkunnartussarsiuussinertaqanngitsumik ingerlanneqarsinnaapput."</p>
	<p>16. § 13-ip kingorna qulequtaq nutaaq ilanngunneqarpoq:</p> <p style="text-align: center;"><i>"Peqataanissamut mattunneqarneq"</i></p> <p>Qulequttap nutaap kingorna ilanngunneqarpoq:</p> <p>” § 13 a. Neqerooruteqartoq imaluunniit taassuma siulersuisuini imaluunniit pisortaaneqarfiani ilaasortat neqeroortitsinerup tamanut nalunaarutigineqarneraniit ullormi kingusinnerpaamik ukiut tallimat iluanni, 2026-mi julip aallaqqaataa sioqqullugu ukunut tallimanut sunniuteqartumut ukunani pineqaatissinneqarsimappat neqeroortitsinerup ingerlanneraniit neqerooruteqartup peqataanissaanut mattutissavaa:</p> <ol style="list-style-type: none"> 1) Akiliilluni pinerluuteqarneq, peqquserlunneq imaluunniit niuernikkut isumaqatigiinnernik ingerlataqarneq. 2) Aaqqissuussaasumik pinerlunniaqatigiinnut peqataaneq. 3) Peqqarniisaarnernut imaluunniit peqqarniisaarnermut atatillugu pineqaatissiissutigineqarsinnaasumik iliuuseqarsimanerit. 4) Aningaasanik peqquserlunnikkut pissarsiarisimasanik malunnarunnaarsaaneq imaluunniit peqqarniisaarniartarnernut aningaassaliissuteqartarneq.

	<p>5) Meeqqanik sulisitsineq imaluunniit inunnik niueruteqarneq.</p> <p>§ 13 b. Neqeroortitsisup neqeroortitsinerup ingerlanneraniit neqerooruteqartup peqataanissamut mattussinnaavaa neqerooruteqartoq:</p> <p>1) akiliisinnaajunnaarsinnaasut suliarineqarpat, akiliisinnaassuseqanngitsutut imaluunniit atorunnaartussatut suliarineqarpat taamaaqataanilluunniit inissisimappat,</p> <p>2) neqeroortitsinerup tamanut nalunaarutigineqarneraniit ullormi kingusinnerpaamik ukiut tallimat iluanni, 2026-mi julip aallaqqaataa sioqqullugu ukiunut tallimanut sunniuteqartumut inuussutissarsiutimi ingerlannerani annertuunik sumiginnaasimappat, tassunga ilanngullugu neqeroortitsisumik imaluunniit pisortani oqartussanik allanik isumaqatigiisummini annertuumik sumiginnaasimappat,</p> <p>3) neqeroortitsinerup tamanut nalunaarutigineqarneraniit ullormi kingusinnerpaamik ukiut tallimat iluanni, 2026-mi julip aallaqqaataa sioqqullugu ukiunut tallimanut sunniuteqartumut neqerooruteqartumiit imaluunniit pisortani oqartussanit allaniit ingerlanneqartumut neqeroorummut atatillugu paasissutissanik eqqunngitsunik piaaraluni tunniussisimappat, imaluunniit</p> <p>4) Kalaallit Nunaanni nunamiluunniit suliffeqarfiup pilersinneqarfigisimasaani akileraarutinik akitsuutinillu akiitsunik akileqquneqartunik 100.000. kr.-t sinnerlugit nalilinnik akiliisimangippat.</p> <p><i>Imm. 2.</i> Suliffeqarfiup imm. 1, nr. 4-mi pineqartup peqataaninneqannginnissaa aalajangiunneqarpat neqerooruteqartitsisup</p>
--	---

	<p>nalunaarutigisinnaavaa suliffeqarfik taamatut pineqartoq mattunneqassanngitsoq, imatut pisoqarpat:</p> <ol style="list-style-type: none"> 1) neqeroortitsinermi peqataasut tamarmik imm. 1, nr. 4-mi nassuiarneqartutut pisortanut akiitsoqarpata, 2) suliffeqarfik 100.000 kr.-t sinnerlugit akiitsut ilaannut qularnaveeqqusiisimappat, imaluunniit 3) suliffeqarfik akiitsut akilernerqarnissaat pillugu isumaqatigiissuteqarpat isumaqatigiissummillu taassuminnga eqquutitsippat.”
<p>§ 15. Neqerooruteqartitsisup suliariumannittussarsiuussinissaq taamaatinngippagu, suliassaq ukuninnga tunngaveqarluni tunniunneqassaaq:</p> <ol style="list-style-type: none"> 1) appasinnerpaamik akeqartitsisumut, imaluunniit 2) tunngavissat assigiinngitsut, soorlu akit, pitsaassuseq, piffissaq sanaffiususaaq, ingerlatsinermut aningaasartuutit, imminut akilersinnaassuseq, teknikkikkut naligititaasoq, avatangiisinut sunniutissat, sanaartugassamut titartakkat atuuffissallu, isumaqatigiissummi pineqartumi allanngorartuusinnaasut eqqarsaatigalugit aningaasaqarnikkut iluanaarnarnerpaamik neqerooruteqartumut. 	<p>17. § 15, imm. 1, nr. 2 imaalissaaq:</p> <p>”2) Suliassaq pineqartoq malillugu allanngorartut piumasaqaatit assigiinngitsut eqqarsaatigalugit aamma illuliorneq sanaartornermilu suliassat, taakkununga teknikikkut ikiunneq imaluunniit illuliornermut sanaartornermullu atortussanik il.il. pilersuineq pineqarnersoq malillugu aningaasaqarnikkut neqeroorut iluatinnarnerpaaq, assersuutigalugu akit, pitsaassuseq, piffissaq sanaartorfiusoq, piffissaq pilersaarufiusoq, ingerlatsinermi aningaasartuutit, imminut akilersinnaanera, teknikikkut nalinga, avatangiisit sunnerneqarneri, illuliassap titartarneqarnera, atorneqarnissaa kiisalu inuiaqatigiinnut akisussaaneq, tassunga ilanngullugit najukkami pissutsit najukkamut tunngassuteqarnera, atuartunik, ilinniartunik suliffimmilu misiliisussanut</p>

	inissat aamma inuit atugarliortut sulisinneqarneri eqqarsaatigalugit.”
<p>§ 20. Neqerooruteqartut, § 1, imm. 2-mut ilaatinneqartut sanaartugassanut siumoortumik neqerooruteqartitsinermik pissarsiniarsinnaangillat, matumani pineqanngippata:</p> <p>1) sanaartugassat katillugit 1.500.000 mio. koruuninik taakkuluunniit inorlugit nalillit,</p> <p>2) sanaartugassat annertussutsimikkut, pitsaassutsimikkut piffissalluunniit ingerlanissaa eqqarsaatigalugu ajornakusoortorujussuarmik neqerooruteqartitsinissamut tunngavissat aqcutigalugit aalajangersarneqarsinnaasut, soorlu misiliilluni suliat, ilisimatusarnerit ineriartortitsinerillu ilaat imaluunniit iluarsartuussinerit, iluarsaassinerit allanngortitsinerillu, suliasalluunniit isumannaallisaaneq eqqarsaatigalugu kinguartinneqarsinnaangilluinnartut,</p> <p>3) suliariumannittussarsiuussinermi neqeroorummik, tassungalu ilanngullugu aningaasaqarnermut peqqussutilluunniit malillugit naleqquttumik tiguisoqarsimangippat, imaluunniit aallaqqaammut neqerooruteqartitsinermi piumasaqaatit annertuumik allannguteqarsimatinnagit siumoortumik neqerooruteqartitsinissaq pillugu allagarsiinermi qinnuteqaatinik tigusaqartoqarsimangippat,</p> <p>4) nunami pissutsit pissutsilluunniit allat peqputaallutik suliffeqarfiit aalajangersimasut pingasut tikillugit kisimik sanaartugassanik suliaqarnissamut periarfissaqarpata, aammalu § 25 a, imm. 4 naapertorlugu isumaqatigiiffiusumik</p>	<p>18. § 20 imatut oqaasertalerneqassaaq: ” § 20. Neqerooruteqartitsisut § 1, imm. 2-mut ilaasut illuliornermi sanaartugassanillu suliaqartinniakkat ilisimatereerlugit neqerooruteqartitsinissaangillat , matumani pineqanngippata:</p> <p>1) suliasaq katillugu nalinga annerpaamik 3.000.000 koruuninik naleqartoq pineqarpat. Illuliornermut sanaartornermullu siunnersuinerli eqqarsaatigaluguli ataatsimut nalinga annerpaamik 10.000.000 koruuninik naleqassaaq,</p> <p>2) sanaartugassat aatsaat neqerooruteqartitsinermi tunngavigisat najoqqutaralugit ajornakusuungaatsiartumik aalajangiiffigineqarsinnaasunik annertussuseqartut, pitsaassuseqartut piffissalerneqarsinnaasullu, soorlu misileraanerit, ilisimatusarnerit ineriartortitsinerillu, imaluunniit nutarterinerit, iluarsaassinerit allanngortiterinerillu, imaluunniit suliasat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaangitsut,</p> <p>3) suliariumannittussarsiuussinermi neqeroorutininik naleqquttunik imaluunniit peqqussutit malillugit suliarineqartunik tiguisoqarsimanginnera, imaluunniit aallaqqaammut neqerooruteqartitsinermi piumasaqaataasut annertuumik allanngortinneqanngippata qinnuteqaatinik tiguisoqarsinnaanginnera,</p> <p>4) nunap ilaani pissutsit imaluunniit pissutsit allat pissutigalugit suliasap suliarinissaanut suliffeqarfiit pingasut tikillugit taamaallaat suliaqarsinnaappata, aamma § 25 a, imm. 4 malillugu</p>

<p>neqerooruteqartitsinissamut aggersaasoqarsimappat, imaluunniit 5) pissutsit aalajangiisuusussat immikkut ittut allat peqqutaallutik entreprenørinimik aalajangersimasumik toqqaasoqartariaqarpat.”</p>	<p>suliaqartinniakkat ilisimatereerlugit neqerooruteqartitsinissamut aggersaasoqarsimappat, imaluunniit 5) suliffeqarfiup aalajangersimasup toqqarneqarnissaa tunngavissat immikkut ittut allat aalajangiisuulluinnartippassuk, imaluunniit inuiaqatigiinni eqqarsaatigisassat, suliaqartinniakkat ilisimatereerlugit neqerooruteqartitsinikkut najukkami suliffeqarfimmut neqeroorutiginissaanut aalajangiisuulluinnartippassuk.”</p>
<p><i>Imm. 3.</i> Neqerooruteqartitsisup qinnuigineqarnermini neqeroorutip itigartinneqarneranut tunngaviusoq neqerooruteqartunut kalluarneqartunut § 15, imm. 3 aamma § 22 naapertorlugit nalunaarutigissavaa, tunngavilersuut § 25, imm. 2 naapertorlugu nalunaarutigineqareersimanggipat.</p>	<p>19. § 24, imm. 3, imatut oqaasertalerneqassaaq : ” <i>Imm. 3.</i> Neqerooruteqartitsisup qinnuigineqarnermini neqeroorutip itigartinneqarneranut tunngaviusoq pillugu neqerooruteqartunut pineqartunut § 13 a, § 13 b, § 15, imm. 3 aamma § 22 naapertorlugit nalunaarutigissavaa, taamatut tunngavilersuut § 25, imm. 2 naapertorlugu nalunaarutigineqareersimanggipat.”</p>
<p>§ 25 a. Neqerooruteqartitsisup siumoortumik nalunaaruteqarnermigut, suliassat imaluunniit suliassat taakku ilaannit ilaasa suut neqerooruteqartitsisup neqerooruteqartitsiviginiarnerai saqqummiussinnaavai. Siumoortumik nalunaarut tusagassiorfitsigut imaluunniit tusagassiorfiit elektroniskiusut aqqutigalugit allagarsiinikkut tamanut ammasumik saqqummiunneqassaaq.</p>	<p>20. § 25 a, imm. 1, oqaaseqatigiit aappaat ima oqaasertaqassaaq: ”Siumoortumik nalunaaruteqarneq pisortat neqeroortitsinernut nittartagaatigut tamanut saqqummiunneqassaaq.”</p>
<p><i>Imm. 4.</i> Neqerooruteqartitsisup siumoortumik neqerooruteqartitsinani</p>	<p>21. § 25 a, imm. 4, oqaaseqatigiit aappaat ima oqaasertaqassapput: ”Suliassamut neqeroorutit pissarsiarinissaanut neqeroortitsisup</p>

<p>aamma isumaqatigiiffiusumik neqerooruteqartitsinani suliariumannittussarsiuussisarnissami, neqerooruteqarnissamut soqutiginnittunik aggersaanikkut siumoortumik nalunaaruteqartarneq atorsinnaavaa. Siumoortumik nalunaarut neqerooruteqartitsisup suliassamut aalajangersimasumut neqerooruteqartitsinermik aallarniinissaa kingusinnerpaamik sapaatit akunnerinik arfineq pingasunik sioqqullugu tamanut ammasumik saqqummiunneqassaaq, taannalu suliassat suut ilaatinneqarnersut, sumiiffik aammalu isumaqatigiissutip naammassinissaanut piffissaq, kiisalu soqutiginnittut saaffiginninnissaannut piffissaq killiliussaq pillugu paasissutissanik imaqaassalluni.</p>	<p>aallartinnissaa sioqqullugu kingusinnerpaamik sapaatit akunneri sisamat sioqqullugit siumoortumik nalunaarut tamanut saqqummiunneqassaaq aamma sulinerit imaluunniit suliassat suut ilaanersut, sumiiffik aamma naammassineqarnissaanut piffissaq kiisalu soqutiginnittut saaffiginninnissaanut piffissaliussaq pillugu paasissutissanik imaqaassalluni.”</p>
<p>§ 35. Sanaartukkat § 1, imm. 2-mi pineqartut suliarineqarnerinut atatillugu ilinniartut qanoq amerlatigisut atorfinitsinneqartarnissaannik Naalakkersuisut maleruagassiorsinnaapput.</p>	<p>22. § 35, imm. 1, imatut oqaasertalerneqassaaq : ”Iluliornerit sanaartukkallu suliarineqarnerinut atatillugu aamma taakkununga teknikikkut ikuiunnermi ilinniartut, ilinniarnermilu atatillugu suliffimmiittut assigisaalluunniit qanoq amerlatigisut atorfinitsinneqartarnissaat pillugu Naalakkersuisut maleruagassiorsinnaapput. Ilinniartut, ilinniartut sungiusartut assigisaallu pillugit malittarisassat eqqortinneqanngippata ullormut akiliititsinissanik immaqaluunniit ataasiartumik akiliitsinissamik Naalakkersuisut aalajangersaasinnaapput.”</p>
	<p style="text-align: center;">§ 2</p> <p>Pisortat oqartussaaffigisaanni suliffeqarfiinilu nioqqutissanik</p>

	kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaanni nr. 6, 12. juni 2019-imeersumi oqaasertalerneqarluni makkua allanngortinneqarput:
<p>§ 2. Inatsisartut inatsisaat una 500.000 kr-nik taakkuluunniit sinnerlugit nalilinnik pisortani oqartussanit imaluunniit suliffeqarfinit allanit nioqutissanik kiffartuussinernillu pisiniarnermut atuuppoq, § 3-p malitsigisaanik inatsimmi matumani pineqanngitsut ilanngunnagit, taamaattorli imm. 2 aamma 3 takuuk.</p>	<p>1. § 2, imm. 1, ima oqaasertalerneqassaaq: ” Inatsisartut inatsisaat manna pisortat oqartussaaffigisaannik suliffeqarfiinilu nioqutissanik kiffartuussinernillu pisiniarnerannut kr. 500.000-nik annertunernilluunniit nalilinnut, § 3 malillugu ilaatitsiviunngitsut ilanngullugit, inatsit atornerqassaaq, taamaattoq takuuk imm. 2.”</p>
<p><i>Imm. 3.</i> Illuliornermi sanaartormilulu suliani 2.500.000 kr.-nik imaluunniit sinnerlugit nalilinnik teknikkip tungaatigut ikiorsiinnermut Inatsisartut inatsisaat atuuppoq.</p> <p><i>Imm. 4.</i> Inatsisartut inatsisaat aamma atuuppoq pisortat pisiniarnerini, neqerooruteqartup nalunaarutigippagu pisiniarneq neqeroorutigineqartoq § 12, imm. 1-imi arlaat 1-ini atornerqarsimappat neqeroorutaasuni taaneqartuni.</p> <p><i>Imm. 5.</i> Imerk, innaallagissamik, kiassarnermillu pisortat pilersuineranni, assartuinermi kiisalu allakkerinermi nalunaarasuartarnermilu inatsit naapertorlugu kisermaassinissamik pisinnaatitaaffeqarfiusuni suliasanut Inatsisartut inatsisaat atuutinngilaq.</p>	<p>2. § 2, imm. 3, atorunnaarsinneqarpoq.</p> <p>Imm. 4 aamma 5 tamatuma kingorna imm. 3-nngorlutillu 4-nngorput.</p>
<p>§ 3. Inatsisartut inatsisaanni malittarisassiani makku ilaannngillat:</p>	<p>3. § 3, nr. 1 ima oqaasertalerneqassaaq: ”1) Illuliornermi sanaartormilulu suliat, illuliornermi sanaartormilulu sulianut teknikikkut ikuiunneq aamma illuliornermi</p>

1) Illuliortiternernik sanaartornernillu suliasat.	sanaartornermilu sulianut atortunik il.il. pilersuineq.”
	<p style="text-align: center;">§ 3</p> Inatsisartut inatsisaat ulloq 2026-imi juulip aallaqqaataani atuutilissaaq.

Ilanngussaq 2**Tusarniaaneq pillugu allakkiaq**

Siunnersuut piffissami 23. januar - 23. februar 2026 tusarniaaffigineqartunut makkununga tamanut ammasumik tusarniaassutigineqarpoq:

- Aningaasaqarnermut Akileraartarnermullu Naalakkersuisoqarfik
- Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik*
- Isumaginninnermut, Suliffeqarnermut Nunamullu Namminermt Naalakkersuisoqarfik*
- Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik *
- Kommune Kujalleq
- Kommuneqarfik Sermersooq*
- Qeqqata Kommunia
- Kommune Qeqertalik
- Avannaata Kommunia
- Sulisitsisut (GE)*
- Nunaqavissut Suliffiutillit Kattuffiat (NUSUKA)*
- Sulinermt Inuussutissarsiuteqartut Kattuffiat (SIK)*
- Atuisoqarnermut Unammilleqatigiinnermullu Aqutsisoqarfik*
- CSR Greenland
- Transparency International Greenland
- Nunatsinni Advokatit
- Nukissiorfiit*
- INI A/S*
- Illuut A/S
- Iserit A/S*
- KNI A/S
- Greenland Airports A/S
- Royal Greenland A/S*
- Sikuki Nuuk Harbour A/S*
- Tusass A/S

Siunnersuut piffissami tassani tamatuma saniatigut tusarniaanermut nittartakkami [naalaakkersuisut.gl] pissarsiarineqarsinnaatinneqarpoq.

Tusarniaanermut akissuteqaatit * nalunaaqutsiullugu tusarniaaffigineqartunit nalunaaqutserneqarsimasunit tiguneqarput. Tusarniaanermut akissuteqaatit pingaarnertigut imaqarniliorneqarput tulliuuttunilu oqaaseqarfigineqarlutik.

Tusarniaaneq inatsisissamut siunnersuummi ataasiakkaanik oqaatsitigut teknikkinullu tunngasutigut allangortitsinissamut pissutissaqalersitsipput.

Siunnersuut ataatsimut isigalugu:

Sulinermik Inuussutissarsiuteqartut Kattuffiat (SIK) akerriliissutissaqanngilaq aammalu siunnersuutip tamakkiisuutillugu piviusunngortinneqarnissaa taperserlugu.

INI A/S akerriliissutissaqanngilaq aammalu siunnersuutip tamakkiisuutillugu piviusunngortinneqarnissaa iluaralugu.

Pisortat illuliassaasa sanaartugassaasalu suliarineqarneranni suliffeqarfiit najukkameersut akuutinneqarnerulernissaasa siunnersuummi periarfissinneqarnera **Sulisitsisut** neriulluarnartutut isigaat, kisianni isumaqarlutik suliniutissaq ilaqtanik ikinngutinilluunniit salliutitsisinnaanerup aarlerinaateqarneranik kinguneqartussaasoq.

Sulisitsisut, teknikkikkut sulialinnut siunnersuisartunut ataatsimiititaliap inatsisissamut siunnersuut tapersersorlugu oqaatigaa. Ataatsimiititaliap immikkut erseqqissarpaa, allaffissorujussuarunnaarsitsinissap siunnersuummi siunertarineqarnerata sunniutigisaanik siunnersuinerup suliaqartinniakkat ilisimatereerlugit neqerooruteqartitsinerup atorneqarneranut aningaasartat qaffasinnerpaaffissaasa qaffanneqarnerat, isumassarsinermiit neqeroortitsinermut suliap ingerlaneranut, inuiaqatigiit aningaasaqarnerannut iluaqutaasumik, sivikillisitseqataasinnaasoq. Ataatsimiititaliap oqaatigaa ingerlatseqatigiiffiit pisortanit pigineqartut inatsimmi pineqartunut ilaasut inatsimmi erseqqissarneqartariaqaraluanneginnersoq isumaliutersuutigineqarsinnaagaluartoq.

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalackersuisoqarfiup ataatsimoortumik nalilersuinermini oqaatigaa, allannguutissatut siunnersuutit najukkami inissisimatitsinerup piginnaasanillu inerisaanerup tungaannut neriulluarnartumik alloriarnerusut, peqatigisaanillu inuiaqatigiinni suliassat sunniuteqarluartumik suliarinissaat qulakkeerniarlugu, inatsit suli eqaatsuutitsinissamut periarfissiisoq.

§ 1, nr. 1-2-mut (neqerooruteqartarnermut inatsimmi § 1, imm. 1-imut, aamma § 2-mut allannguutit):

Royal Greenland A/S isumaqarpoq, aalajangersakkat marluk taakkua allanngortinneqarnissaannik siunnersuutigineqartut suliassaqarfiup neqeroortitsivigineqartussaataasup annertusitinneranik kinguneqartussaasut, imaatut paasillugu ”illuliornerni sanaartornernilu” suliassat taamaangippat nalinginnaasumik taaguummi ilaatinneqartussaannikkaluartut, ilaatinneqalertussanngorlutik, assersuutigalugu Danmarkip tungaanut qivaraanni. Ingerlatseqatigiiffik isumaqarpoq, neqeroortitsinerup

ingerlanneqarnera aningaasartuutissat annertunerulerlutik isumalluutinillu atuinerusussanngorluni tulluanngitsunik sunniuteqartussaasoq.

Akissut: Naliliineq Naalackersuisoqarfiup isumaqatiginngilaa. Allannguut suliassaqaarfinnik neqeroortitsivigineqartussaataasunik annertusititsinngilaq, kisianni neqeroortitsinissamut pisussaaffinnik atuutereersunik tulleriissaartumik periaaseqarluni ataatsimoortitsineruvoq, takukkit § 1, nr. 1-2-mut nassuiaatit.

Neqerooruteqartarnermut_inatsisip atuuffissaasa annertusitinneqarnissaasa siunnersuutigineqarnerani, taamaalilluni inatsimmi – illuliornermut sanaartornernullu neqerooruteqartitsinerup saniatigut – teknikkinut ikiuunnissamut (siunnersuinerit) aammalu illuliornermut sanaartornernullu atugassanik atortussanik il.il. pilersuinerup pineqartunut ilaatinneqalernerat, tassaannngilaq ”suliassaqaarfiup neqeroortitsivigineqartussaataasup” nalinginnaasumik annertusitinneqarnera. Siunnersuinerit atortussanillu pilersuinerit neqeroortitsivigineqartarnerat ullumikkut neqerooruteqartarnermut inatsimmi maleruagassiivigineqartareerpoq, taamaalillunilu neqerooruteqartarnermut inatsimmi tamanna aalajangersarneqarsimatillugu suliassat taakkua neqeroortitsivigineqarnissaat pisussaaffioreerpoq.

Neqeroortitsinerup neqeroortitsisumut, taamaalilluni inatsimmut ataasiinnarmut taarsiullugu inatsisini marlunni misissuisussaaajunnaartumut, pisariinnerusumik ingerlanneqarnissaa siunertaralugu, illuliornermut sanaartornermullu suliassaqaarfiup iluani suliassanik pilersuinerinillu tamaginni neqerooruteqartitsinerup maleruagassat, allannguutissatut siunnersuutigineqartumi ataatsimoortinneqarput.

Taamatuttaaq ”illuliornermut sanaartornermullu” taaguutip allanngortinneqarnissaanut siunnersuutip atuutilernerani suliarineqartussat imaluunniit suliassat taaguummi ilaatinneqartutut isigineqartussat annertusitinneqanngillat. Taamaallaat taaguutinik erseqqissaaneq tassani pineqarpoq, suliarineqartussat suliassallu qanoq ittut neqerooruteqartarnermut inatsimmi pineqartunut ilaanersut, erseqqissartussaassallugit. Misilittakkat takutippaat, suliarineqartussat suut neqerooruteqartarnermut inatsimmi ilaatinneqarnerisut, neqeroortitsisut akornanni ilaannikkut nalornissutigineqalertartoq.

Danmarkimi illuliornermut sanaartornernullu taaguummi pisortani oqartussat neqeroortitsisarnerat pillugu Europa-Parlamentip Siunnersuisooqatigiillu malitassiaannut 2014-02-26-meersumut ilanngussaqaq II-mi nassuiaassut malinneqarpoq:

– ”illunik illorsuarnillu nutaanik sanaartorneq, nutarterineq nalinginnaasunillu iluarsaassineq”

inatsisissamut siunnersuummi nassuiaassummut sanilliullugu annertuumik allaanerunani.

Royal Greenland A/S-ip allannguutissatut siunnersuutigineqartunut nassuiaatit itisilerneqarnerunissaat ugartorpaa, taamaalilluni nassuiarneqarnissaa nalornissutigineqalersinnaassanani.

Akissut: Tusaatissatut tiguneqarpoq. Allannguutissatut siunnersuutigineqartunut nassuiaatit naleqquttumik annertussusilimmik annertusitinneqarput.

§ 1, nr. 3-mut (neqerooruteqartarnermut inatsimmi § 2 a nutaaq):

Iserit A/S isumaqarpoq, soqutigisat aporaannerannut nassuiaassummi ”kikkut tamarmik” ilaatinneqartariaqaraluartut aammalu ”siunnersortinuinnaq” killeqartinneqartariaqanngikkaluartoq.

Sikuki Nuuk Harbour A/S-ip taamaaqataanik tunngavilersuuteqarluni aalajangersakkap oqaasertalerneqarnera allanngortinneqassasoq siunnersuutigaa.

Akissut: Tusaatissatut tiguneqarpoq. Taaguut ”siunnersortit” aalajangersakkami peerneqarpoq aammalu ”inuk” taarsiutigineqarluni.

Atuisoqarnermut Unammilleqatiginnermullu Aqutsisoqarfiup inassutigaa, soqutigisat aporaannerat pillugu maleruagassat isiginiarneqarnissaanni, pisortat ingerlatsineranni suliassanik suliarinnittarneq pillugu Inatsisartut inatsisaat naapertorlugu suliamut attuumassuteqarpallaannginnermut maleruagassat nalinginnaasut atorneqarnissaannut killeqartinneqanngitsoq, inatsisissamut siunnersuummut nassuiaatini erseqqissarneqassasoq.

Akissut: Tusaatissatut tiguneqarpoq. Erseqqissaanissamut siunnersuutigineqartoq aalajangersakkamut nassuiaatini ilanngunneqarpoq.

§ 1, nr. 5-imut, nr. 14-imut aamma nr. 20-mut (neqerooruteqartarnermut inatsimmi § 3, imm. 2-mut, § 12-imut aamma § 25 a, imm. 1-imut allannguutit):

Iserit A/S aamma **Nukissiorfiit** isumaqarput, neqeroortitsinissap allagarsiissutigineqarnerani ”tamanut saqqummiussineq sunniuteqarnerpaatut iluseqartoq” toqqarnissaa neqeroortitsisup nammineerluni aalajangersinnaasariaqaraluaraa.

Iserit A/S-ip siunnersuutigaa allagarsiinissamut maannamut piumasaqaat, tassalu ”tusagassiutit naqitat imaluunniit elektroniskiusut atorlugu tusagassiutit aqqutigalugit neqerooruteqartitsinissamut allagarsiineq” atuutsiinnarneqassasoq.

Akissut: Naalakkersuisoqarfiup siunnersuut akuerisinnaangilaa. Nr. 5-imut nassuiaatini allassimasutut, neqeroortitsinerup allagarsiissutigineqarnissaanut piumasaqaatip allanngortinneqarnerani, neqeroortitsinerup allagarsiissutigineqarnerata ullutsinnut naleqqunnerunissaa assigiissaartumillu tamanut saqqummiunneqarnissaa,

siunertarineqarpoq. Pisortat neqeroortitsisut ataatsimoorluni aallaavissami neqeroortitsinissaminnik allagarsiisarnerat neqerooruteqartussanut iluaqutaasutut isigineqartariaqarpoq, tamatumalu paasiuminartuutitsinissaq naligiimmillu periarfissaqarnissaq taperserpaa.

Kisiannili tusagassiutini allani, naqitani taamatullu qarasaasiatigoortuni, allagarsiinermi pisortat neqeroortitsinermut nittartagaanni ataatsimoorussami allagarsiisussaanermut neqeroortitsisup tapertaqartitsinissaa akornuserneqanngilaq.

Nukissiorfiit aamma **Sikuki Nuuk Harbour A/S**-ip neqeroortitsisut ataatsimoorfissamut isersinnaatinnearpata, tamannami maannakkorpiaq taamaanngimmat, pisortani neqeroortitsisut neqeroortitsinissamut allagarsiinerminnik nalunaarutiginninnermut ataatsimoorumik qarasaasiatigut ataatsimoorfissamik atuinissaat taperserpaat.

Akissut: Tusaatissatut tiguneqarpoq, Namminersorlutik Oqartussani atorsinnaasumik qarasaasiatigut ataatsimoorfissamik, pisortani neqeroortitsisut, neqerooruteqartarnermut inatsimmi pineqartunut ilaasut, tamarmik akeqanngitsumik atorsinnaasaannik, kingusinnerpaamik allanngortitsinissamut inatsisip atuutilernerani, pilersitsinissaq siunertarineqartoq, oqaatigineqarluni.

Sikuki Nuuk Harbour A/S-ip siunnersuutitaa aalajangersakkap oqaasertalerneqarnera imatut allanngortinneqassasoq: ”Tamanut ammasumik suliariumannittussarsiuussinermi suliaasaq pisortat neqeroortitsinermut nittartagaanni allagarsiissutigineqassaaq, taamaalillutik suliffeqarfiit soqutiginnittut tamarmik neqerooruteqarnissamut periarfissaqassallutik”.

Akissut: Tusaatissatut tiguneqarpoq. Imarisaasa erseqqissarneqarnissaat siunertaralugu aalajangersakkap oqaasertalerneqarnera iluarsineqarpoq.

§ 1, nr. 6-imut (neqerooruteqartarnermut inatsimmi § 5-imut allannguut):

Iserit A/S-ip oqaatigaa, sinaakkutissatut isumaqatigiissut taamaalilluni paasineqassasoq suliaasat taamaqatigiit arlallit sinaakkutissatut isumaqatigiissutip iluani suliarineqarsinnaasut, tassami taamatut isumaqatigiissutip iluseqarnerani tamannarpiaq iluaqutissartaammat.

Akissut: Siunnersuummi § 1, nr. 7 naapertorlugu sunniutaasumik naqqiissuteqarneq taamaallaat pineqartoq pillugu oqaaseqarluni allanneqarpoq. Sinaakkutissatut isumaqatigiissutip nassuiaassuterpaa, takuuk neqerooruteqartarnermut inatsimmi § 5, imm. 1, allanngortinnagu ingerlateqqinneqarpoq. Sinaakkutissatut isumaqatigiissutit erseqqinnerusumik nassuiarneqarnissaannut nassuiaatit, sanaartornermi neqerooruteqartitsisarneq pillugu Inatsisartut inatsisaata piareersarlugu suliarineqarneranut ilaatillugu suliarineqartut, innersuussutigineqarput.

§ 1, nr. 11-mut (neqerooruteqartarnermut inatsimmi § 7, imm. 3-mut allannguut):

Neqeroortitsisup neqeroortitsinissaminik aaqqissuussinermini piviusunngortitsinerminilu najukkami pissutsinik najukkamilu inissisimanermik akuutitsinissamat periarfissinneqarnera **Sikuki Nuuk Harbour A/S**-ip neriulluarnartutut isigaa.

Akissut: Tusaatissatut tiguneqarpoq.

Nukissiorfiit inuiaqatigiinni akisussaassuseqarnek najukkamilu inissisimatitsineq qanoq paasineqarnissaat pillugu malittarisassanik ujartuivoq.

Akissut: Tusaatissatut tiguneqarpoq, tassani siunnersuutip § 1, nr. 20-p ataani akissuteqaat innersuussutigineqarluni.

§ 1, nr. 11-imut (neqerooruteqartarnermut inatsimmi § 7, imm. 4-mut allannguut):

Pisortatigoortumik ataatsimut piumasagaatinik atuinnissaq **Sikuki Nuuk Harbour A/S**-ip taperserpaa, kisianni aalajangersakkap allanngortinneqarnera sukaterinertut isigalugu aammalu inuussutissarsiornerup ineriartornissaata malitassanit ullutsinnut naleqqutinngitsunit unittoortinneqarnissaa aarleqqutigalugu oqaatigalugu.

Akissut: Aalajangersagaq sukannernerulersinneqanngitsoq oqaatigalugu allanneqarpoq. Allanngortitsinissamat siunnersuutigineqartumi siunertaavoq illuliornermut sanaartornermullu suliassaqarfimmi ataavartumik sukkasuumillu ineriartornerup akuersaarnissaa, tassani naatsorsuutigineqartariaqarluni pisortat piumasagaataat ataatsimoorussat ingerlaavartumik nutarterneqartassasut. Allannguutissatut siunnersuutigineqartoq aalajangiusimaannarneqarpoq.

§ 1, nr. 12-imut (neqerooruteqartarnermut inatsimmi § 7, imm. 5-imut allannguut):

Iserit A/S-ip oqaaseq ”aalajangersakkat ataatsimoorussat” imatut ”piumasagaatit ataatsimoorussat” iluarsineqassasoq, siunnersuutigaa.

Akissut: Tusaatissatut tiguneqarpoq. Aalajangersakkap oqaasertai siunnersuutigineqartutut iluarsineqarput.

Sikuki Nuuk Harbour A/S isumaqarpoq, pingaartumik suliassani anginerusuni, assersuutigalugu nunani allani malitassat akuerisaasut isumaqatigiissummut piumasagaatinut tunngavigineqarnissaannut neqeroortitsisoq periarfissinneqartariaqaraluartoq.

Immikkut mianerisassat suut piumasagaatit ataatsimoorussat saneqqunnissaannut tunngavilersuutaasinnaanersut pillugu malittarisassanik **Sulisitsisut** ujartuipput.

Akissut: Aalajangersakkami piumasaqaatit ataatsimoorussat tunngavilersuutitalimmik saneqqunneqarnissaannut periarfissiinissaq siunertarineqartoq oqaatigalugu, allanneqarpoq. Aalajangersakkamut nassuiaatit annertusitinneqarput, neqeroortitsisup, tamanna tunngavissaqarpat, (aamma) nunani allani malitassat akuerisaasut atorsinnaagai, allanneqarluni. Piumasaqaatit ataatsimoorussat saneqqunneqarnissaannut tunngavilersuutaasinnaasunik pisoqarnerinut assersuutissanut, nassuiaatit, sanaartornermi neqerooruteqartitsisarneq pillugu Inatsisartut inatsisaata piareersarlugu suliarineqarneranut ilaatillugu suliarineqartut, innersuussutigineqarput.

§ 1, nr. 13-imut (neqerooruteqartarnermut inatsimmi § 8, imm. 1-imut allannguut):

Nunaqavissut Suliffiutillit Kattuffiat (NUSUKA) isumaqarpoq suliassat akilersinneqartussat atorineqarnerannut aningaasartaasa qaffasinnerpaaffissaat 200.000 koruuninut appartinneqartariaqaraluartoq. Kattuffiup tamatumunnga tunngavilersuutigaa suliffeqarfiit assigiinngitsut arlallit taamaaliornermi suliassat ilaannik pissarsisalernissaat. Tassunga tunngatillugu kattuffiup oqaatigaa aningaasartaannut killiliusaaq appasinneruppat, neqeroortitsisup assersuutigalugu maannakkut aningaasartaannut killiliusaaq 500.000 koruuniusoq inulaarlugu annertussuseqalersillugit suliassap ilai annikinnerusunngorlugit suliassaq tamarmiusoq aggulullugu aningaasannanniartoqartarunnaarneranik, tamanna kinguneqartussaasoq.

Akissut: Siunnersuummi § 1, nr. 7 naapertorlugu sunniutaasumik iluarsineq taamaallaat pineqartoq oqaatigalugu, allanneqarpoq. Tamatuma saniatigut aalajangersakkap imarisai allannguuteqartinnagit ingerlateqqinneqarput. Naalakkersuisoqarfik naliliivoq, suliassat annikinnerusut 200.000 koruunit tungaannut nalillit tamanut ammasumik neqeroortitsineq pillugu maleruagassani sukkulluunniit ilaatinneqalissagaluarpata, suliassanut neqerooruteqartitsinermi allaffissornermut aningaasartuutit naapertuutinningsumik annertuujusussaasut. Suliassap ataatsimoorup tamanut ammasumik neqeroortitsinissap pinngitsoortinnissaa siunertaralugu suliassat ilaannut annikinnerusunut aggulunneqarnera, maleruagassanik avaaqutaarinerussaaq.

§ 1, nr. 15-imut (neqerooruteqartarnermut inatsimmi § 13-imut allannguut):

Nunaqavissut Suliffiutillit Kattuffiata (NUSUKA) oqaatigaa, eqqarsaaraanni suliassat tamarmik tamanut ammasumik neqeroortitsivigineqartassasut, suliffeqarfiit pisariaqartunik pisinnaasaqanngitsut imaluunniit suliassat suliarinissaannut pisariaqartunik immikkut ilisimasaqanngitsut, nalinginnaasumik neqerooruteqanngiinnartarput. Allatigulli periarfissaq tassaavoq, suliffeqarfiup suliassaq suliarisinnaanissaa anguniarlugu suliffeqarfimmik ataatsimik arlalinnilluunniit, ujartorneqartunik immikkut ilisimasalimmik/-nnik suleqateqarnissaq, tamannalu tunngavigalugu neqerooruteqarlutik.

Akissut: Siunnersuummi § 1, nr. 7 naapertorlugu sunniutaasumik iluarsineq taamaallaat pineqartoq oqaatigalugu, allanneqarpoq ("entreprenørit" taarserneqarpoq taarsiullugu

”suliffeqarfiit”). Tamatuma saniatigut aalajangersakkap imarisai allannguuteqartinnagit ingerlateqqinneqarput, aammalu sanaartornermi neqerooruteqartitsisarneq pillugu Inatsisartut inatsisaata allanngortinneqarnissaa pillugu Inatsisartut inatsisaata nr. 15, 26. november 2020-meersup piareersaalluni suliarineqarneranut ilaatillugu nassuiaatit suliarineqarsimasut innersuussutigineqarput.

§ 1, nr. 16-imut (neqerooruteqartarnermut inatsimmi §§ 13 a aamma 13 b nutaat):

Neqerooruteqartarnermut inatsimmi § 13 a naapertorlugu kinaassusersiunngitsumik tunngavissarititaasut tunngavigalugit neqerooruteqartussanik mattussisussaannerup atuutsinneqalernera **Atuisoqarnermut Unammilleqatigiinnermullu Aqutsisoqarfiup** iluaraa, kisianni neqerooruteqartarnermut inatsimmi § 13 b nutaaq naapertorlugu mattussinissamut tunngavissarititaasunik nammineq toqqarneqarsinnaasunik atuutsitsilernissap ernumassutiginera oqaatigalugu, aammalu maleruagassat qanoq nassuiarneqassanersut paasinarsisinnissaanut nassuiaatini malittarisassaqaarnissaa ujartorlugu. Aqutsisoqarfik isumaqarpoq neqerooruteqartoq ”annertuumik sumiginnaasimanersoq”, ilanngullugit ”isumaqatigiissummik annertuumik sumiginnaasimanersoq”, imaluunniit neqeroortitsinerup ingerlaneranut atatillugu ”paasissutissanik eqqunngitsunik tunniussisimanersoq” nalilernissaannut, ataasiakkaatigut naliliineq apequtaasussaasoq, tamannalu tunngavigalugu inassutigalugu inatsisissamut siunnersuummut nassuiaatit, aalajangersakkami maleruagassat neqeroortitsisumit passunneqaarnissaannut tapersiisussanik, assersuusiorluni annertusitinneqassasut.

Tamatuma saniatigut, inatsisissamut siunnersuummut nassuiaatit naapertorlugit neqerooruteqartup ilumoorluinnarluni uppersaalluni paasissutissiinerata misissornissaanut neqeroortitsisup pisussaaffeqannginnera **Atuisoqarnermut Unammilleqatigiinnermullu Aqutsisoqarfiup** upperinngilaa, tamannalu tunngavigalugu isumaqarluni, neqerooruteqartup paasissutissiissutaasa misissorneqarnerat aatsaat neqeroorutip tiguenerata kingorna ingerlanneqassappat, neqeroortitsinerup ingerlanera sivitsorsarneqarsinnaasoq, pingaartumik mattussinissap nalilerneqarneranut tunngavissarititaasut suut ataasiakkaatigut tunngavigineqarnersut neqeroortitsinerumut najoqqutassani ersarissumik allassimanani pisoqartillugu. Malittarisassat neqeroortitsisut maleruagassanik assigiissaartumik atuinissaannut nassuiaanissaannullu tapersiisut, aqutsisoqarfiup ujartorpai.

Neqerooruteqartarnermut inatsimmi § 13 b nutaaq naapertorlugu mattussinissamut tunngavissarititaasunik nammineq toqqarneqarsinnaasunik atuutsitsilernissaq **Sikuki Nuuk Harbour A/S**-ip iluaraa, ilanngullugu suliffeqarfiit ukiut 5-it kingulliit iluanni neqeroortitsisumut isumaqatigiissummik sumiginnaasimasut mattunneqaarnissaannut periarfissaq. Neqeroortitsisup suliffeqarfiit neqerooruteqartikkusunngisamik, ilanngullugit pingaartumik neqerooruteqartut ”isumaqatigiissutinik sumiginnaasimasut”, neqerooruteqartussatut toqqannginnissaannut periarfissarissaarnerunissaata neqerooruteqartarnermut inatsimmi atuutsinneqalernera, ingerlatseqatigiiffiup pingaartippaa.

Kisianni assersuutiniq erseqqissaasunik nassuiaatit itisilerneqarnissaat ingerlatseqatigiiffiup ujartorlugu, taamaalilluni maleruagassat nassuiarneqarnissaat nalornissutigineqalissanani, tamatumunngalu assersuutit iluaqutaassallutik.

Annertuunik sumiginnaasoqarsimanersoq, aamma piaaraluni paasissutissanik eqqunngitsunik tunniussisoqarsimanersoq, aammalu assersuutigalugu eqqartuussivimmi aalajangiisoqarsimanersoq, pillugit qanoq kinalu nalilersuissanersoq malittarisassat **Nukissiorfiit** ujartorpai.

Akissut: Tusaatissatut tiguneqarpoq. maleruagassat atorineqarnissaannik paasinarsisitsisunik aalajangersakkamut nassuiaatit assersuutiniq annertusitinneqarput, ilanngullugit Sikuki Nuuk Harbour A/S-imit assersuutit attuumassutillit.

Aallaaviatigut paasissutissat tunniunneqartut eqqortuunerannik nalornilersitsisunik ataasiakkaatigut pisoqarsimangippat, neqeroortitsisup ilumoorluinnarluni uppernarsaaneq tunngavigisinnaavaa. Taamatut pisoqartillugu neqeroortitsisoq erseqqinnerusumik misissuinissamut pisussaaffeqalertarpoq, takukkit aalajangersakkamut nassuiaatit.

Pisuni tamaginni, nalornissuteqartoqanngippat, ataatsimut isigalugu neqeroortitsisup misissuisussaatitaalernissaa naleqquttuosorineqanngilaq. Taamaattoq tamanna pisariaqartutut imaluunniit naleqquttutut nalilerneqarpat, neqeroortitsisoq neqerooruteqartumi ataatsimi arlalinniluunniit misissuinissamut pisinnaatitaavoq.

§ 1, nr. 17-imut (neqerooruteqartarnermut inatsimmi § 15, imm. 1, nr. 2-mut allannguut):
Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat **Isumaginninnermut, Suliffeqarnermut Nunamullu Namminermit Naalakkersuisoqarfiup** eqqumaffigeqquaa.

Akissut: Tusaatissatut tiguneqarpoq. Siunnersuummi § 1, nr. 24-mut nassuiaatini Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaannut innersuussut ikkunneqarpoq.

Nukissiorfiit inuiaqatigiinni akisussaassuseqarneq najukkamilu inissisimatitsineq qanoq paasineqarnissaat pillugu malittarisassanik ujartuivoq.

Akissut: Tusaatissatut tiguneqarpoq. najukkami inissisimaneq inuiaqatigiinnilu akisussaaffeqarneq qanoq paasineqassanersut, aalajangersakkamut nassuiaatit erseqqinnerusunik allalluni ilaneqarput, ilanngullugit tunngavissaqarnissaa, annertoqqatigiissitsinissaq paasiuminartitsinissarlu pillugit piumasaqaatit isiginiarneqarnissaat. Tamatuma saniatigut § 1, nr. 20-mut (neqerooruteqartarnermut inatsimmi § 20, nr. 5-imut allannguut) tusarniaanermut oqaaseqaatinut akissutit takukkit.

§ 1, nr. 18-mut (neqerooruteqartarnermut inatsimmi § 20, nr. 1-imut allannguut):

Iserit A/S isumaqarpoq siunnersuineranut suliaqartinniakkat ilisimatereerlugit neqerooruteqartitsinerup atornerqarneranut aningaasartaasa annerpaaffissaat siunnersuutigineqartoq (10 mio. kr.) qaffasippallaartoq, tamannalu siunnersuisartut unammilleqatigiinnissaannut killiliisoq. Ingerlatseqatigiiffik isumaqarpoq suliaqartinniakkat ilisimatereerlugit neqerooruteqartitsinerup atornerqarneranut aningaasartaasa annerpaaffissaat, suliassanut neqerooruteqartarnermut inatsimmi pineqartunut ilaasunut tamanut assigiittariaqaraluartoq (3 mio. kr.).

Sulisitsisut naliliipput suliassani tamani qanorluunniit ittuni suliaqartinniakkat ilisimatereerlugit neqerooruteqartitsinerup atornerqarneranut aningaasartaasa annerpaaffissaat qaffasissorujussuarmut aalajangerneqartoq, ilassutigalugulu siunnersuineranut isumaqatigiissutit 10 mio. koruunit sinnerlugit nalillit taama amerlatiginaviangitsut.

Sulisitsisut, teknikkikkut sulialinnut siunnersuisartunut ataatsimiititaliaq allappoq, najukkani siunnersuisartut naligiimmik pineqarnissaat eqqarsaatigalugu, siunnersuineranut suliaqartinniakkat ilisimatereerlugit neqeroortitsinerup atornerqarneranut aningaasartaannut qaffasinnerpaaffissaq sumi inissinneqartariaqaraluarnerasoq (5 mio. kr. imaluunniit 10 mio. kr.) oqallisigineqarsinnaasoq.

Nunaqavissut Suliffiutillit Kattuffiat (NUSUKA) isumaqarput, aalajangersagaq imatut paasineqartariaqartoq, tassani illuliornermik sanaartornermillu suliaqarnermut teknikkikkut siunnersuinermik suliaqarnissaq pillugu isumaqatigiissutit imaluunniit illuliornermik sanaartornermillu suliaqarnissamut sanaartugassamut pilersaarusernerup suliarineqarnissaa pillugu isumaqatigiissutit kisimik pineqartunut ilaatinneqartut. Tassunga tunngatillugu kattuffiup siunnersuutigaa teknikkikkut siunnersuinissaq pillugu isumaqatigiissutini 450.000 koruunit angullugit nalilinnut aammalu illuliornermik sanaartornermillu suliaqarnissamut sanaartugassamut pilersaarusernerup suliarineqarnissaa pillugu isumaqatigiissutini 3.000.000 koruunit angullugit nalilinnut taamaallaat suliaqartinniakkat ilisimatereerlugit neqerooruteqartitsineq atornerqarsinnaassasoq.

Illuliassanut sanaartugassanullu suliaqartinniakkat ilisimatereerlugit neqerooruteqartitsinerup atornerqarneranut aningaasartaasa annerpaaffissaasa 3 mio. koruuninut qaffanneqarnerat **Sikuki Nuuk Harbour A/S**-ip iluaraa, kisianni isumaqarluni teknikkinut siunnersuineranut suliaqartinniakkat ilisimatereerlugit neqerooruteqartitsinerup atornerqarneranut aningaasartaasa 10 mio. koruuninut annerpaaffissalernera qaffasippallaartoq. Suliassanut tamanut qanorluunniit ittunut suliaqartinniakkat ilisimatereerlugit neqerooruteqartitsinerup atornerqarneranut aningaasartaasa annerpaaffissaat assersuutigalugu 3 imaluunniit 5 mio. koruuniulluni assigiissasoq, isumaliutigineqarnissaa ingerlatseqatigiiffiup siunnersuutigaa. Ingerlatseqatigiiffiup misilittagai malillugit suliaqartinniakkat ilisimatereerlugit

neqerooruteqartitsineq, najukkami pissutsit isiginiarlugit, unammilleqatigiinneq ajoqusernagu, aammalu naligiissitsinissaq pillugu piumasaqaat saneqqunnagu, aaqjissuunneqarsinnaavoq.

Mianerisassat annertuut kinaassusersiunngitsullu tamatumunnga tunngavilersuutigineqarsimanngippata, teknikkinut siunnersuinermit suliaqartinniakkat ilisimatereerlugit neqerooruteqartitsinerup atorneqarneranut aningaasartaasa annerpaaffissaata allanngortinneqarnissaa siunnersuutigineqartoq piviusunngortinneqassanngitsoq **Atuisoqarnermut Unammilleqatigiinnermullu Aqutsisoqarfiup** piumasaraa. Siunnersuinermit suliaqartinniakkat ilisimatereerlugit neqerooruteqartitsinerup atorneqarneranut aningaasartaasa annerpaaffissaat siunnersuutigineqartoq (10 mio. kr.) nangaanartoqartillugu aqutsisoqarfiup oqaatigaa aammalu neqerooruteqartarnermut inatsimmi maleruagassanut atuuttunut sanilliullugu allannguutitut annertuutut isigalugu, taanna naapertorlugu illuliornerni sanaartornernilu teknikkinut ikiuunnissamut isumaqatigiissutit 2,5 mio. koruunit sinnerlugit naleqarpata, taakkua tamanut ammasumik neqeroortitsivigineqartussaallutik. Aqutsisoqarfik isumaqarpoq, neqeroortitsisut taamatut annertussusilimmik siunnersuinermit isumaqatigiissutit tamanut ammasumik neqeroortitsiviginissaannut pisussaaffeqanngippata, allannguut teknikkinut siunnersuinermit niuerfimmi unammilleqatigiinnermik sanngiillisitsisussaasoq, tamannalu neqerooruteqartarnermut inatsimmi aamma neqerooruteqartarnermut inatsimmi siunertaasut eqqarsaatigalugit naleqqutinngitsutut aqutsisoqarfiup isigaa.

Ingerlaqqilluni **Atuisoqarnermut Unammilleqatigiinnermullu Aqutsisoqarfiup** oqaatigaa ”siunnersuinermit suliaqartinniakkat ilisimatereerlugit neqerooruteqartitsinerup atorneqarneranut killissaliussaq [...] illuliassarpiaamut sanaartugassarpiaamullu suliaqartinniakkat ilisimatereerlugit neqerooruteqartitsinissamut killissaliussamut, 3 mio. koruuninut killilerneqarsimasumut, ataqatigiissillugu isiginiarneqartariaqarpoq”, aammalu ”illuliassanit misilittakkat paasinarsisippaat, siunnersuinerit illuliassamut aningaasartuutit tamarniusut 10-20 %-iisa missaannik annertussuseqarajuttut” inerniliillunilu: ”Taamaattumik siunnersuinermit annerpaaffissaliussaq, illuliassap tamarniusup tunngavissat nalinginnaasut tunngavigalugit qanoq akeqarnissaata ilimagineqartup pingasoriaataa sinnerlugu annertunerusup, atuutsinneqalernissaa naleqqutinngitsutut isikkoqarpoq”. Tassunga atatillugu neqeroortitsisup neqeroortitsinerminik ingerlatsinermini allaffissornikkut nammagassat oqinnerulersinnissaat kissaatigippagu, siunnersuinerit sinaakktissatut isumaqatigiissutitut neqeroortitsivigineqartarnissaannut periarfissaqarnera, aqutsisoqarfiup tikkuarpaa.

Akissut: Tusaatissatut tiguneqarpoq, oqaatigineqarluni aningaasartaannut killiliussassatut siunnersuutigineqartuni unammilleqatigiinnerup eqqarsaatigineqarnissaata aammalu allaffissornikkut nammagassat eqqarsaatigineqarnissaasa ataatsimoortumik naliliiffigineqarnerat tunngavigineqartoq.

Teknikkinut siunnersuineq inatsimmi pineqartunut ilaatinneqartariaqaraluarnersoq, neqerooruteqartarnermut inatsisip suliarineqarnerani nalornissutigineqarsimavoq, tassami sanatitsisup teknikkinullu siunnersortip akornanni, inatsisilerinikkut siunnersortinut kukkunersiuisunullu, neqerooruteqartarnermut inatsimmi ilaatinneqanngitsunut, assingusumik, immikkut tatigeqatigiinneq amerlanertigut atuuttartoq, oqaatigineqarsinnaalluni. Teknikkinut siunnersuinerup ilaatinngilluinnarnissaanut taarsiullugu ilusiliaq siunnersuutigineqarpoq, tassami suliassat annertunerusut suli tamanut ammasumik suliariumannittussarsiuussivigalugit neqeroortitsivigineqartassallutik, suliassallu annikinnerusut suliaqartinniakkat ilisimatereerlugit neqeroortitsinertut neqeroortitsivigineqarsinnaallutik.

Aningaasartaasa 10 mio. koruuninut killilerneqarnissaat siunnersuutigineqartoq suliaqartinniakkat ilisimatereerlugit neqeroortitsinerup atorineqarneranut annerpaaffissaavoq aammalu neqeroortitseriaatsip taassuma aningaasartaasa killissai tikillugit atorineqarnissaanik pisussaaffeqarnermik kinguneqartussaanani. Taamaalilluni neqeroortitsisup tamanut ammasumik suliariumannittussarsiuussinissaq toqqarsinnaavaa imaluunniit tamanna naleqquttutut nalilerneqarpat appasinnerusumik aningaasartai killissalerlugit aalajangersarsinnaallugit.

Tassunga tunngatillugu oqaatigineqassaaq neqerooruteqartarnermut inatsimmi neqeroortitsisut amerlanerusut pineqartunut ilaatinneqarmata, ilanngullugit ingerlatseqatigiiffiit pisortani aalajangiisuusumik sunniuteqartartut kiisalu illuliornerit sanaartorerillu pisortanit tapersiivigineqartartut. Taamaattumik neqeroortitsisut suliassallu assigiinngitsunik suussusillit akimorlugit maleruagassiineq suliaqarnermi atoruminartuussaaq.

Teknikkinut siunnersuinermut niuerfik killeqarpoq, aammalu suliffeqarfiit nunatsinniittut suliassanik annertunerusunik suliaqarnissamut pisariaqartunik piukkunnassusillit ikittuinnaapput. Suliassat annertunerusut suli unammilleqatigiissitsivigineqartarnissaat maleruagassiinissamut siunnersuutigineqartumi allanngortinneqanngilaq, kisianni suliassat annikinnerusut akunnattumillu angissusillit passunneqartarneranni eqaannerulersitsisoqarluni. Allannguutissatut siunnersuutigineqartoq aalajangiusimaannarneqarpoq.

§ 1, nr. 18-mut (neqerooruteqartarnermut inatsimmi § 20, nr. 2-mut allannguut):

Kommuneqarfik Sermersooq isumaqarpoq aalajangersakkap oqaasertai ”[...] suliassat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaanngitsut” nassuiarnissaa amigaataasorujussuusoq.

Nunaqavissut Suliffiutillit Kattuffiat (NUSUKA) isumaqarpoq aalajangersagaq atorunnaarluinnartariaqaraluartoq, aammalu suliassap tamakkiisup nassuiaatitaqartup

nutarterinernik, iluarsaassinernik allanngortiterinernillu suliaqarnernut neqerooruteqartitsinermut tunngavissatut tamatigut suliarineqartarnissaa orniginartillugu. Taamaaliornermi suliffeqarfii amerlanerusut suliassanut neqerooruteqarnissamut periarfissaqalissapput.

Akissut: Siunnersuummi § 1, nr. 7 naapertorlugu sunniutaasumik naqqiissuteqarneq taamaallaat pineqartoq pillugu oqaaseqarluni allanneqarpoq. Tamatuma saniatigut aalajangersakkap imarisai allanngortinneqarput, aammalu nassuiaatit sanaartornermi neqerooruteqartitsisarneq pillugu Inatsisartut inatsisaata piareersarlugu suliarineqarneranut ilaatillugu suliarineqartut innersuussutigineqarput.

§ 1, nr. 18-mut (neqerooruteqartarnermut inatsimmi § 20, nr. 5-imut allannguut):

Atuisoqarnermut Unammilleqatigiinnermullu Aqutsisoqarfiup inassutigaa ”inuiaqatigiinni eqqarsaatigisassat” neqeroortitsisup suliassami suliaqartinniakkat ilisimatereerlugit neqeroortitsinermik atuinerani toqqarneqarsinnaasunut immikkut tunngavissani peerneqassasoq, tamatumunngalu tunngavilersuutigalugu ”tamanna inuiaqatigiit aningaasaqarneranni sunnuteqarluarunnaarsitsinermik kinguneqarsinnaasoq” kiisalu neqeroortitsisup neqeroortitsinninnissamut, tamatumunngalu taarsiullugu mianerisassat taakkua assingi innersuussutigalugit suliaqartinniakkat ilisimatereerlugit neqeroortitsinermik atuinissamut, periarfissinneqarnerani ”tunniussinermut atatillugu tunngavissaqanngitsunik mianerinninnissaq aarlerinaateqarnerulertussaasoq”.

Aqutsisoqarfiup tassunga tunngatillugu oqaatigaa ”najukkani pissutsit mianerineqarnissaat tunniussinissamut tunngavissarititaasunut ilaatillugit ilanngunneqarsinnaapput ”neqeroorut aningaasaqarnikkut iluaqutissartaqarnerpaaq”, tunngavissarititaasut tunngavissalimmik paasiuminartumillu ilusilersorneqarsimappata” allallunilu mianerisassat taamaattut tunniussinissamut tunngavissarititaasut atorneqarpata ersarissuutitsinissaq anguneqartussaasoq aammalu neqerooruteqartut tamarmik naligiimmik inissinneqartussaasut.

Akissut: Tusaatissatut tiguneqarpoq, oqaatigineqarluni inuiaqatigiinni eqqarsaatigisassat, ilanngullugit najukkami pissutsit aamma/imaluunniit najukkami inissimatitsinerup mianerineqarnissaat tamatumunnga aalajangiisuuppata, suliaqartinniakkat ilisimatereerlugit neqeroortitsinerup atorneqarsinnaanissaa suli naleqquttutut isigineqartoq.

Inuiaqatigiinni eqqarsaatigisassat suut atuunnersut, soorlu taakkua tamanut ammasumik suliariumannittussarsiuussinerup ingerlanneqarnerani naammattumik isiginiarneqarsinnaannginersut ataasiakkaatigut uppernarsaatitalimillu nalilersuinissaq, aalajangersakkap atorneqarnissaanut pisariaqarpoq.

Mianerisassat taamaattut tunngavissaqanngitsumik imaluunniit pisortat ingerlatsinerannut inatsisini tunngaviusut naliginnaasut, ilanngullugit naligiissitsinissaq

kinaassusersiunninnissarlu, isiginiarnagit atorneqarsinnaanerannik, aalajangersagaq kinguneqartussaangilaq. Suliaqartinniakkat ilisimatereerlugit neqeroortitsinerup atorneqarnera inatsimmi killissat iluanni sulii pissaq.

Oqaatigineqassaaq, pisuni aalajangersimasuni allatut iliuusissaq tassaassammat tamanut ammasumik suliariumannittussarsiuussineq, tassani mianerisassat taamaaqatai neqeroortitsinerup aaqqissuunneqarneranut ilaatillugu ilanngunneqartussaallutik. Pisuni inuiaqatigiinni eqqarsaatigisassat ataasiakkaatigut atuutsillugit, annertoqqatigiinnerusumik isumalluutinillu sipaarfiunerusumik periaaseqarnissaq, aalajangersakkami siunnersuutigineqartumi periarfissiissutigineqarpoq. Allannguutissat siunnersuutigineqartoq aalajangiusimaannarneqarpoq.

Nukissiorfiit isumaqarpoq najukkani suliffeqarfiit salliutinnissaannut allannguut ammaassisooq, aammalu tunngavissarititaasut uppersaanissamullu piumasqaatit sukannernerusut erseqqissarneqarnissaat ujartorlugu.

Kommuneqarfik Sermersooq isumaqarpoq aalajangersakkap nassuiarneqarnissaa annertuumik amigartoq.

Akissut: "Inuiaqatigiinni eqqarsaatigisassat" matuma siuliani akissummi nassuiarneqarnerat innersuussutigalugu, allanneqarpoq. Aalajangersakkap imarisai pillugit allatigut nassuiaatit sanaartornermi neqerooruteqartitsisarneq pillugu Inatsisartut inatsisaat piareersarlugu suliaqarnermut ilaatillugu suliarineqartut innersuussutigineqarput.

§ 1, nr. 19-imut (neqerooruteqartarnermut inatsimmi § 24, imm. 3-mut allannguut):

Nunaqavissut Suliffiutillit Kattuffiat (NUSUKA) isumaqarpoq suliariumannittussarsiuussinermi imaqarniliat tamatigut suliarineqartassasut, aammalu neqeroorutip atorneqarnianninnerani tamatigut tunngavilersuisoqartassasoq.

Akissut: §§ 13 a aamma 13 b nutaat ilanngunneqarnerisa kingorna sunniutaasumik iluarsiineq taamaallaat pineqartoq oqaatigalugu, allanneqarpoq. Tamatuma saniatigut aalajangersakkap imarisai allannguuteqartinnagit ingerlateqqinneqarput, aammalu sanaartornermi neqerooruteqartitsisarneq pillugu Inatsisartut inatsisaata piareersarlugu suliarineqarneranut ilaatillugu nassuiaatit suliarineqartut innersuussutigineqarput. Pingaartumik § 24, imm. 1-imi aamma § 25, imm. 2-mi aalajangersakkat, neqeroortitsisoq tamanna pillugu piumasqaammik saqqummiisoqanngikkaluartoq, aalajangiinnermut tunngavilersuutigineqartup nalunaarutiginnissaanut pisussaaffeqarluni, pisunut maleruagassiiviusut, Naalakkersuisoqarfiup innersuussutigai.

§ 1, nr. 22-mut (neqerooruteqartarnermut inatsimmi § 35, imm. 1-imut allannguut):

Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat **Isumaginninnermut, Suliffeqarnermut Nunamullu Namminermt Naalackersuisoqarfiup** eqqumaffigeqquaa.

Akissut: Tusaatissatut tiguneqarpoq. Siunnersuummi § 1, nr. 24-mut nassuiaatini Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaannut innersuussut ikkunneqarpoq.

Ilinniartut qassit suliassami aalajangersimasumi atorfinitsinneqassanersut inatsisikkoortumik aalajangersarneqassappat, tamanna naleqqutinngitsoq **Iserit A/S** isumaqarpoq aammalu inuusuttut akornanni suliassaqarfiup soqutigineqannginnera, piffissami ilinniarnep nalaani uniinnartartut kiisalu aningaasaqarnek suliassallu allanngorartarnerisa annikittarnerat pissutigalugu ilinniartoqalernissamut/ilinniartunik sungiusartoqalernissamut assassornermut suliffeqarfiit minnerusut ajornakusoortitsisarnerat, illuliassani ilinniarfissanik pissarsiniartarnerup ajornakusoorneranut tunngaviusartunut assersuutitut tikkuarlugit.

Ilinniartunik atorfinitsitsisarnek pillugu maleruagassat malinneqannginneranni ullormut akiliisitsisarnissap imaluunniit allatut pineqaatissiisarnissap inatsisitigut aalajangersarneqarsinnaanissaa pillugu siunnersuummut **Sikuki Nuuk Harbour A/S** akerliuvoq. Ingerlatseqatigiiffik isumaqarpoq tamanna isumaqatigiissuteqartarnermi susassaqarfiusoq, pissutsit pillugit isumaqatigiissutip sumiginnarneqarnerani neqeroortitsisumit iliuuseqarfigineqarsinnaanerulluni.

Akissut: Sanaartornermi ilinniartoqartarnek pillugu Namminersorlutik Oqartussat nalunaarutaata atuutsinneqalernerani piginnaatitsissut atorineqareersoq pillugu oqaaseqarluni allanneqarpoq.

Aalajangersakkap immersugassap ingerlateqqinneqarnera tassani pineqarpoq, taanna malillugu ilinniartut illuliornerup sanaartorerullu suliarineqarneranni atorfinitsinneqartussat amerlassusissaat pillugu maleruagassanik aalajangersaanissamut Naalackersuisut piginnaatitaallutik. ilinniartunik atorfinitsitsinnginnermi ullormut akiliisitsinerit imaluunniit ataasiartumik akiliisitsineq aallartinneqarsinnaasut ilanngunneratigut, piginnaatitsissut erseqqissarneqassasoq siunnersuutigineqarpoq. Sinaakkutissanut aalajangersakkamut ilanngunneqartup taassuma atuutsinneqalernerani, pissutsit isumaqatigiissummi tunniunneqartumi iliuuseqarfigineqassasut, oqaatigineqassasoq ilimanarpoq.

§ 2, nr. 2-mut (neqerooruteqartarnermut inatsimmi § 2, imm. 3-p atorunnaarsinneqarnera):

Nukissiorfiit oqaatigaat neqerooruteqartarnermut inatsimmi § 2, imm. 3-p atorunnaarsinneqarnerani allanneqartariaqaraluartoq, imm. 4 aamma 5 tamatuma kingorna imm. 3-nngortoq aamma 4-nngortoq.

Akissut: Tusaatissatut tiguneqarpoq. Aalajangersagaq iluarsineqarpoq.